

文獻叢編

第三十六輯



中華民國二十五年十二月出版

文獻叢編第三十六輯

編輯所


國立北平故宮博物院文獻館

發行所

國立北平故宮博物院出版物發行所
電話 東局 四四三六

印刷所

北平宜內東斜街新新印書局
電話 西局 五五六八



費	郵		價目表	
	本	市	五	每月一册
每期一分	外	埠	角	半年六册
每期一角	外	埠	二元七角	每年十二册
每期二角五分	外	國	五元二角	

本市 上海 天津各大書店均有代售

文獻叢編第三十六輯目錄

江寧漢府機房圖

清內務府所藏明代印章

清仁宗實錄館奏摺檔 內閣大庫檔

光緒庚子辛丑電報 軍機處檔

蘇州織造李煦奏摺 宮中檔案

奏報米價摺

奏報春雨如膏米價仍賤摺

奏賀萬壽摺

奏保運使李陳常署理鹽院摺

奏春雨時降並報米價摺

奏四省重運糧船過揚北上並報米價摺

奏代呈撫臣張伯行奏摺

奏撫臣查拏散帽黨徒及妖術叫魂案摺

奏雨水調勻米價仍賤摺

奏雨澤缺少並報米絲價目摺

奏甘霖大霈摺

奏請繼任鹽差摺

奏甘霖連降今秋仍望豐收並報米價摺

覆奏訪明散藤帽叫生魂事摺

查復撫臣張伯行怕人殺他事一怕海賊一怕仇人摺

奏產鹽地望雨心切並報米價摺

奏報妻韓氏病故臨危之際囑謝隆恩摺

奏刈稻將完並報米價摺

奏謝李陳常鹽差餘銀補照所欠錢糧摺

奏報米價摺

代李陳常謝恩並請准李具摺奏事摺

奏鹽差任滿俟冊籍造竣後卽詣京陛見摺

奏起身進京日期並着家人進呈李陳常摺件摺

教案史料 軍機處檔

英教士楊格非在漢口被毆案

英欽差威妥瑪知照英教士在漢口被毆情形照會附鈔單

福建建甯府教民被擾案

英欽差威妥瑪知照鈔送教民被擾案關係文件照會附鈔單

福建羅源縣教民被逐案

英欽差威妥瑪知照羅源教民被逐各緣由照會附鈔單

工程史料 內務府檔

總理工程處三和等奏估修太平村南府景山等處工料銀兩摺

總理工程處三和等奏估造供經龕一座需用工料銀兩摺

總理工程處三和等奏估修嵩祝法淵等寺需用工料銀兩摺

總理工程處三和等奏估修盤山行宮等處需用工料銀兩摺

奏為估修嵩祝法淵等寺需用工料銀兩摺

奏為估修盤山行宮等處需用工料銀兩摺

奏為估修嵩祝法淵等寺需用工料銀兩摺

奏為估修盤山行宮等處需用工料銀兩摺

奏為估修嵩祝法淵等寺需用工料銀兩摺

奏為估修盤山行宮等處需用工料銀兩摺

奏為估修嵩祝法淵等寺需用工料銀兩摺

奏為估修盤山行宮等處需用工料銀兩摺

奏為估修嵩祝法淵等寺需用工料銀兩摺

奏為估修盤山行宮等處需用工料銀兩摺

清仁宗實錄館奏摺檔 內閣大庫檔

冊面原題「舊存奏摺檔」「天字第一號」「嘉慶二十五年九月至道光四年四月」所錄館臣奏摺二十二通，舉仁宗實錄館開館至全書告成一切陳請奏報事件彙於一篇，亦珍籍也

一

大學士臣曹振鏞等跪奏爲恭謝天恩事竊照恭修仁宗睿皇帝實錄本月初七日奉旨著派協辦大學士尙書伯麟尙書英和左都御史汪廷珍爲總裁官侍郎恩銘王引之王鼎文孚廉善內閣學士杜堦爲副總裁官理藩院侍郎博啟圖爲蒙古副總裁官欽此又初八日奉上諭著派大學士曹振鏞充實錄館監修總裁官欽此欽爲我皇上基紹軒圖治循堯典欽武烈文謨之著天地爲昭篤水原本本之思尊親莫大茂承丕著式迪前光寅念先猷集大成於上聖恭編實錄垂隆軌於億年雖載筆載言具存方策而詞繁詞簡宜慎校讐命纂輯之共襄知闡揚之莫罄伏念仁宗睿皇帝道超姚姒功邁羲農勅一二日之幾康聖由天縱亶廿五年之兢業德協乾行蕩蕩難名巍巍莫及臣等學術疎

踏見聞簡陋久依壽載未能識聖神文武之真共戴生成罔或窺博厚高明之量茲蒙簡命倍切悚兢惟有憚力從公小心將事竭編摩之微悃祇仰欽裁衷體要於羣言恭呈御定臣等曷勝感激屏營之至謹合詞繕摺恭謝天恩伏乞皇上睿鑒謹奏本日奉旨知道了欽此嘉慶廿五年九月初九日大學士臣曹振鏞協辦大學士臣伯麟尙書臣英和左都御史臣汪廷珍

奏爲請旨事臣等竊查嘉慶四年恭修高宗純皇帝實錄敬繕御覽本一部大內尊藏本一部皇史宬尊藏本一部盛京尊藏本一部派用滿洲字蒙古字纂修官各十員繙譯官各二十二員漢字纂修官翰林二十員收掌官八員謄錄滿洲蒙古字官各二十四員謄錄漢字貢監生員二十四員滿洲蒙古漢提調各一員仁宗睿皇帝聖德神功光昭前烈所有恭修實錄應用纂修繙譯謄錄收掌及提調各員人數自應仍如舊額行文該員衙門照例咨送其餘供事紙匠厨役及門官火房阜隸及一切應用桌飯錢糧紙張筆硯桌橙器具等項悉

照例行文各該衙門揀選支取倘日後纂修等官有應酌量增添者臣等再行奏請告成之日照例分別等第議叙需用房間已欽遵諭旨將會典館東西兩所房間粘修作爲實錄館所有開館日期應行文欽天監選擇至一切開館儀注應交禮部查照舊例議奏爲此具奏請旨謹奏嘉慶廿五年九月十四日監修總裁大學士臣曹總裁官大學士臣戴總裁官協辦大學士臣伯總裁官吏部尙書臣英總裁官禮部尙書臣汪副總裁官吏部左侍郎臣恩副總裁官吏部右侍郎臣王引之戶部右侍郎臣廉戶部右侍郎臣王工部右侍郎臣文內閣學士臣杜理藩院侍郎臣博

三

奏爲恭謝天恩事本月初十日內閣奉上諭現值天氣嚴寒實錄館人員朝夕恭纂書籍著加恩於例支柴炭外所有冬臘正三月每月賞銀五十兩以爲燈火薪水之資在廣儲司支領欽此竊臣等職叨視草才媿緝蒲循編年系月之經紀承烈顯謨之大仰維聖孝述功德以昭垂總秉宸裁愧管蠡之窺測屬以

祁寒乍屆特蒙溫諭優加捧出精鏐須從內府念無微而不到焚膏悉荷夫恩
光惠所至而必周珥筆咸霑夫闔澤臣等惟有精加檢繕勤効校讎期成事於
編摩冀少酬夫教育并據闔館人等感謝微忱臣等謹繕摺恭謝天恩伏祈皇
上聖鑒謹奏嘉慶二十五年十一月十一日奉旨知道了欽此後銜與前同

四附片一

奏爲請旨照例添設纂修等官事竊臣等奉勅恭修仁宗睿皇帝實錄查照嘉
慶四年初次舊額奏設滿州蒙古纂修官各十員繙譯官各二十二員漢纂修
官二十員滿洲蒙古漢字謄錄各二十四員並聲明如有應行酌量增添之處
再行奏請在案茲臣等於嘉慶二十五年十月十二日開館咨取各項檔案書
籍飭令在館人員趕緊辦理查嘉慶四年四月開館後館臣旋以舊額員數不
敷奏稱量加添派可以及早告成轉不致多靡帑項因陸續請添滿洲蒙古纂
修官各十員繙譯官各十八員漢協修官八員滿洲蒙古漢字謄錄各十六員
均疊蒙仁宗睿皇帝諭旨允行所有高宗純皇帝實錄一千五百卷六十餘年

之書至嘉慶十二年前後九載一律辦竣臣等伏查舊額員數係乾隆初年章程其時恭修世宗憲皇帝實錄十三年之書辦至乾隆六年始竣自不若仿照上屆酌添人員趕辦計四年之內可以告成再上屆額設滿洲蒙古漢校對官各十四員後又添設額外滿漢校對各二十員額外蒙古校對十五員額設供事五十二名後又添設三十五名此次均請照設所有添設各員臣等仍酌量館務情形隨時咨取如足敷辦公卽行停止不敢少有冒濫至房間尙不敷用現已行文內務府趕緊修葺添蓋應由該衙門派委妥員一員常川在館約束工匠及蘇拉人等並稽催照料以期速迅辦理不致多延時日合併陳明是否有當伏乞皇上訓示謹奏

附片

再向來各館供事定例自結到之日當差起扣至五年期滿甄別每十名錄取七名咨退三名已得議叙者卽無庸甄別竊臣館現在恭辦仁宗睿皇帝實錄正當緊要之時所有供事等朝夕在館當差若五年期滿隨時甄別勢必多易

生手查會典館於嘉慶十一年五月二十四日奏准五年期滿之供事請旨免其甄別留館辦書在案臣館應請旨准照會典館之例五年報滿之供事免其甄別於館務實有裨益合並奏聞謹奏道光元年二月初八日奉旨依議欽此後銜與前同

臣等謹奏

奏爲請旨事竊臣館滿洲總纂官同麟於本月十一日奉旨補授盛京刑部侍郎所遺總纂一缺臣等公同揀選得滿洲纂修官刑部員外郎阿廉繙譯精熟以之充補滿洲總纂官堪期勝任理合恭摺奏聞再查臣等於開館時奏明額設滿洲蒙古漢纂修官各二十員又續經奏添漢協修官八員俱奉旨允准在案臣等伏查清文蒙古文功課較繁現屆纂辦緊要之際合無仰懇恩准循照舊例添設滿洲蒙古協修官各八員則滿洲蒙古漢員額缺相符辦理可無遲誤如蒙俞允臣館仍行文各衙門咨取通曉繙譯人員嚴密考試揀選充補臣等爲慎重館務起見是否有當伏乞皇上訓示謹奏道光元年六月二十七日

具奏本日奉旨依議欽此後銜與前銜同

六附片一

奏爲奏聞事竊臣等奉命恭修仁宗睿皇帝實錄自上年十月開館以來所有咨取添設在館人員各事宜業經隨時奏准在案臣等率同總纂纂修協修等官悉心編纂凜遵面奉訓示以事之繁簡爲卷之多寡期於宏綱細目無漏無支現已陸續繕成嘉慶元二二三等年漢字黃綾本應行恭呈御覽隨行文欽天監據選得本月十八日進書吉臣等謹遵向例自十八日爲始每日恭進實錄黃綾本一冊其有例不進書各日期謹依內閣來文辦理除將恭進日期照例知照內閣外合行恭摺具奏伏乞皇上聖鑒謹奏

附片

再謹查清書黃綾本上屆恭纂高宗純皇帝實錄清漢本同日恭進惟清書須俟漢書纂成後方能起稿且漢書一頁清書字數則需三頁是以上屆滿洲協修一項陸續添至七十六員之多臣等公同酌議此次清書黃綾本應請於漢

書進呈後兩月再行進呈其額設滿洲纂修二十員協修八員較之上屆人數太多懇請再添設滿洲協修十六員如蒙俞允於辦理清文功課益覺裕如再蒙古黃綾本應請仍照舊定章程分季恭進理合附片奏聞謹奏道光元年八月十六日奉旨依議欽此後銜同前

七附片一

奏爲請旨事竊臣館滿洲總纂官玉慶于八月二十四日因病出缺所遺總纂一缺臣等公同揀選得滿洲纂修工部額外主事黃怡德繙譯精熟以之充補滿洲總纂官堪期勝任理合恭摺奏聞謹奏

附片

再謹查臣館纂辦蒙古文尙未添設總纂官現在趕辦功課正當緊要之際臣等公同酌擬添設蒙古總纂官二員以專責成今於蒙古纂修官揀選得候補主事音德布主事職銜忠福二員諳熟蒙古繙譯堪以充補所有該員等應得公費卽照纂修之例一體支給伏候訓示遵行理合附片奏聞謹奏道光元年

九月初七日本日奉旨依議欽此後銜與前同

八

奏爲請旨事竊臣等奉敕恭修仁宗睿皇帝實錄現已遵照舊式恭繕黃綾本排日陸續進呈卽應依限趕繕大內皇史宬內閣盛京紅綾本四分敬慎尊藏以昭鉅典臣等已由內閣請出紅綾本並行文盛京將軍將盛京尊藏本式樣繪圖咨送到館遵照辦理外所有皇史宬尊藏本二分相應請旨請出清字蒙古字漢字實錄各一函臣館敬謹照式辦理以昭畫一卽于次日恭繳理合繕摺奏聞謹奏道光元年十月十六日本日奉旨知道了欽此銜同前

九

奏爲恭繕紅綾本添設謄錄以符額缺事竊臣等奉敕恭修仁宗睿皇帝實錄現已恭繕紅綾本排日陸續進呈自應趕繕紅綾本以期依限告成伏思大內皇史宬內閣盛京尊藏紅綾本各一部卷帙浩繁現在額設滿洲蒙古漢員謄錄各四十員實不敷用伏查上屆恭修高宗純皇帝實錄時因謄錄繕寫不敷

適逢恭繕五朝實錄完竣卽酌留滿洲謄錄四十二員蒙古謄錄二十員漢謄錄二十四員幫同恭繕高宗純皇帝實錄足以如期告成現在趕繕紅綾本功課緊要合無仰懇天恩仍照舊額添設庶書籍可以迅速告蒞如蒙俞允臣館卽行文吏部咨取所有應支公費照例辦理再臣館現在添員繕書房間尙不敷用查附近實無修建之地臣等酌擬借用傳心殿後房八間並東夾道房十間作爲滿漢校對書籍之所則臣館繕書房間自行寬裕惟該二處離館較遠稽查難周擬設額外收掌官四員在彼照應值宿於館務實有裨益是否有當伏乞皇上訓示遵行謹奏道光元年十月十六日具奏本日奉旨依議欽此後銜與前同

十 附片 一

奏爲奏聞事竊臣等奉勅恭修仁宗睿皇帝實錄自漢字本定稿後臣等率同滿洲總纂纂修等官悉心繕纂並揀員詳細覆看現將嘉慶元年至三年清字黃綾本陸續恭繕臣等謹遵前奉諭旨清字黃綾本每次進呈五冊並將漢字

黃綾本一並進呈俟發下之次日再進五冊以後俱照此辦理理合恭摺具奏
伏乞皇上聖鑒謹奏

附片

再蒙古字黃綾本向係分季進呈此次奉旨清字黃綾本每次進五冊所有蒙古字黃綾本自應一體辦理臣等謹擬將清字本先行進呈俟兩月後再行恭進蒙古字黃綾本理合附片奏聞謹奏道光元年十一月初二日具奏本旨奉旨依議欽此前後銜同前

十一

奏爲請旨校改畫一恭摺奏聞事竊臣等恭纂仁宗睿皇帝實錄逐日繕呈御覽計漢文黃綾本已進至嘉慶七年卽須分繕紅綾正本以便將來一律告竣惟是其中書法字句不無參差互異之處若必遵照館書成例於垂成之時始行辦理畫一則清文蒙古文漢文一體抽換篇頁未免工倍費繁臣汪廷珍昨於召對之次陳明仰蒙皇上天恩准照國史館辦理畫一章程粘貼黃簽先行

陸續更正臣麟慶臣胡達源慎司校改臣等率同提調臣貴慶臣沈維鑄認真經理務期刻日完竣卽行趕繕紅綾正本不致有稽時日是否有當敬謹繕摺奏聞伏乞皇上聖鑒謹奏道光元年十二月十七日奏本日奉旨依議欽此

十二

奏爲請旨事竊臣等奉敕恭纂仁宗睿皇帝實錄自嘉慶二十五年十月開館以來督同在館人員敬謹纂辦恭繕黃綾本排日進呈現在漢書進至嘉慶十五年清書進至九年蒙古書進至六年統計正副稿本共一千四百餘卷臣等伏查嘉慶年間恭修高宗純皇帝實錄二十年書成時奉上諭現在恭纂高宗純皇帝實錄已進至乾隆二十年所有在館官員及謄錄供事等均着交部照例議叙欽此旋經館臣分別等第開單具奏奉上諭前因恭纂高宗純皇帝實錄已進至乾隆二十年特降旨將在館官員及謄錄供事等交部議叙茲據該總裁等將在館官員等分別等第開單具奏並聲明總裁官總纂官不敢仰邀議叙敬念皇考高宗純皇帝享國久長功德昭垂超越前古恭纂實錄卷帙繁

多該總裁總纂等盡心編輯闡繹前謨將來全書告成自當一體給予議叙至
尙書彭元瑞專勘稿本尤爲出力此次卽着交部議叙其在館奮勉列爲超等
之提調官員外郎玉寧着照所請以四品京堂升用遇有缺出開列請旨洗馬
施杓著加恩遇應行開列之處開列在前請旨升用仍將該二員交部議叙纂
修官侍讀學士法式善著交部議叙校對官候選郎中謝揚鎮候選知州朱振
聲朱景華候選鹽大使孫鑄候選七品小京官曹江均着加恩各照本職卽用
餘依議該部知道摺單並發欽此嗣經御史秦維嶽奏奉上諭御史秦維嶽
奏實錄館議叙過優有礙銓法請旨仍交部照例議叙一摺所奏固是向來開
館纂輯實錄闡繹前謨原與他館修書有別其議叙定例亦較他館爲優皇考
高宗純皇帝臨御六十年來功文巍煥卷帙繁多曾降旨每書成二十年給予
議叙一次上年十二月恭纂實錄進至乾隆二十年經朕特降諭旨照例議叙
該總裁等旋復開單進呈奏請分別升用朕特以該館人員纂辦尙爲迅速並
無舛漏當卽降諭俯允用示鼓勵豈有復行撤回之理况館臣所議各條該部

仍須再行核辦不致格礙難行至該御史所稱提調洗馬施杓遇有應升之缺開列在前不免攙越等語卽如昨日廣西學政出缺施杓亦在應放之例朕並未將伊簡放豈一經開列在前卽可仰邀擢用乎所有此次在館人員給予優叙之處仍照前旨核辦此後再纂輯二十年書成時不得復照此次從優以昭限制欽此旋屆乾隆四十年書成奏請議叙奉旨崑山伊興阿均照所請准其儘先補用餘依議至另片奏法式善等十員俟全書告成時再行給與議叙欽此又嘉慶十一年奉上諭嗣後各館纂辦書籍至一百數十卷以上者准其奏請優叙分別超一二等其不及百卷者止准一二等照例議叙以杜冒濫欽此欽遵各在案今臣館恭修仁皇睿皇帝實錄所有清書漢書蒙古書均已按年趕緊纂辦四分紅綾正本業經陸續發繕但來經恭進不得作爲功課計現已進呈之書及正副稿本共一千四百餘卷與奏請議叙之例相符且查兩年以來在館人員追溯仁宗睿皇帝厚澤深恩仰見我皇上孝思不匱無不踴躍趨公盡心纂校所有繕妥各卷恭呈御覽仰蒙聖明隨時指示統計全書辦成過

半除臣等受恩深重不敢仰邀議叙外所有在館翰詹各員應俟全書告成再行奏請與闔館人員一體優叙其餘在館之各衙門司員以及供事人等合無仰懇聖慈允行賞給議叙一次以示鼓勵如蒙俞允臣等再行分別等第核定章程具奏爲此謹奏請旨道光二年七月二十七日具奏本日奉上諭現在恭纂皇考仁宗睿皇帝實錄已進至嘉慶十五年所有在館各衙門司員及階錄供事等均着交部照例議叙欽此

十三

奏爲奏聞事竊臣等奉敕恭修仁宗睿皇帝實錄聖訓自嘉慶二十五年十月開館以來督同在館人員敬謹纂辦計日可期葢事例應遵照御覽黃綾本恭繕紅綾本四分本中大內皇史宬內閣三處尊藏本每分均應恭繕清字蒙古字漢字各一部盛京尊藏本例不繕蒙古字應恭繕清字漢字各一部統計四千一百餘卷約裝一千一百餘套又聖訓紅綾本四分例不繕蒙古字每分均應恭繕清字漢字各一部統計六百餘卷約裝一百餘套所有裝潢等項應用

全黃雲鳳花綾藍色素綾金黃素絹應照例開明數目行文江寧織造敬謹製
造辦送其金櫃等項應照例行文工部領取實工實料敬謹製辦惟四分尊藏
紅綾本應用金龍包袱向由工部畫辦嗣於嘉慶十年十一月初三日奉旨實
錄館應用裝潢泥金畫龍包袱向係畫金成做恐不能經久着交江寧蘇州杭
州等處照發來式樣改爲織金龍明黃包袱敬謹織妥做成包袱運送來京以
備應用欽此臣館此次自應遵照上屆章程一體辦理所有應用織金龍包袱
紫地白花錦帶本色雲頭牙籤理合恭摺奏明臣等卽合計套數照例開明數
目並將舊存式樣行文內務府發交三處織造敬謹造辦限於道光三年八月
以前解送臣館以備應用爲此謹奏道光二年八月初四日具奏本日奉旨依
議欽此後銜同前

十四 附片一

奏爲請旨事竊臣等於道光二年七月二十七日奉上諭現在恭纂皇考仁宗
睿皇帝實錄已進至嘉慶十五年所有在館各衙門司員及謄錄供事等均著

交部照例議叙欽此仰見我皇上逾格推恩微勞必錄至意在館人員無不感
激歡忭臣等伏思辦理議叙必須核實核實首嚴等第其等第之優絀則以功
課之多寡差使之勤惰爲程除現在黃綾正本仍按日恭進外所有此次議叙
功課謹擬將漢書截至十五年十二月清書截至九年十二月蒙古書截至六
年十二月查臣館各項人員其行走平常者業經隨時咨駁凡在館額內額外
人員一體當差自應一體列入等第其中纂協修校對繙譯謄錄四項以功課
之多寡爲等第收掌供事兩項以差使之勤惰爲等第其緣事離館人員亦應
按在館時功課差使分別等第其到館不及半年者仍請扣除以示限制惟是
議叙後此次已邀議叙人員例應離館查該員等自開館以來承辦功課均已
諳悉應請照上屆章程酌留以資熟手又查各館謄錄供事俱扣足年限銓選
今臣館謄錄供事併日趨辦功課與各館計日扣算者不同亦應照上屆奏定
章程無庸扣足年限再查議叙條例吏部於嘉慶十七年間奏定核減並聲明
特旨開設之館聽館臣擇尤爲出力人員保奏其餘概不准自定班次開單聲

請以杜冒濫等因在案今臣館恭修仁宗睿皇帝實錄與特旨開設之館辦理各項書籍者不同仰蒙天恩議叙自應令微末人員實承渥典臣等仰體鴻慈共同商酌查舊例內武職官員改補文職及供事分發各省儘先補用等條均係過優應俟全書告成時再請遵照列聖實錄告成議叙一體辦理所有此次議叙咨交吏部查照嘉慶年間實錄館初次二次議叙暨內閣覆校處聖訓校勘處議叙歷次辦過成案將實缺人員議給分別題選以應升之京缺卽用其中書筆帖式議給以額外主事用其業經保送記名者議給儘先升選候補候選人員議給儘先選補其在本班行走已逾年限業經挨次頂補者議給補缺後以應升之缺間缺升用其業經各衙門奏留者均照實缺人員議叙其由科甲出身候補者仍准以科甲本班先補有職銜者議給照銜銓補其宗學人員以宗人府應升之缺先用其內務府所屬各項人員以內務府公缺先行升補其俸滿外用願就京職者准其照上屆覆校處外用人員改就京職之例以歸選之缺先予選用再查議叙人員內有上屆條款所無者如收掌官候補貼寫

中書穆克登阿曾邀國史館議叙儘先補用此次本班無可再加應請比照上屆聖訓校勘處各衙門奏留候補筆帖式照實缺議叙例給予議叙謄錄官候選同知徐青照中式進士歸班查本館進士謄錄均應以知州雙單月先用徐青照本係同知應請以同知不論雙單月卽用再查上屆實錄館三次議叙均以超一二等註冊嗣於嘉慶十九年吏部奏定各館議叙不准用超等字樣今臣館遵例註爲一二三等所有議叙條款自應仍照上屆超一二等章程一體辦理應請勅下部臣查照題定舊案議給至供事等俱係初邀議叙若卽議給不論雙單月均准選用未免過優應請歸於單月不論何項班次並是否積缺統計二缺之後選用一人出自皇上逾格天恩他館不得援以爲例謹繕等第人數清單恭呈御覽所有臣等酌議之處是否有當伏候訓示施行謹奏請旨

附片

再查各館議叙例應擇尤爲出力人員據實保奏臣館尤爲出力人員總纂官參事史致儼侍講學士沈維鏞現係三四品京堂提調官候補主事貴慶曾任

侍郎府尹均不敢仰邀議叙漢書纂修官中允麟慶承辦畫一所有進呈黃綾正本逐卷均經其手細心編摩提調官編修胡達源承辦館務悉臻妥善均係尤爲出力之員應先行聲明仍俟全書告成時再行優叙外清書纂修官原任同知英泰前於嘉慶年間恭修高宗純皇帝實錄該員曾充纂修議叙洵升福建同知緣署知府任內承辦案件開報遲延降二十九級例准抵銷無級可抵部議革職上年臣伯麟等考取本館纂修該員繙譯精熟辦書認真供事唐霖承值檢查書籍晝夜在館最爲奮勉合無仰懇天恩賞給英泰筆帖式唐霖八品職銜以示鼓勵如蒙俞允英泰俟有在京各衙門筆帖式缺出無論旗分卽補唐霖俟全書告成時再行議給班次歸選再查蒙古館尤爲出力之員除提調官前任太僕寺卿現任頭等侍衛巴琿阿不敢仰邀議叙外總纂官晉德布前於國子監司業任內因誤齋戒降調道光元年廢員引見奉旨以主事用該員繙譯較優當差勤慎合無仰懇天恩將該員作爲理藩院候補主事遇有缺出不論題選先補臣等未敢擅便謹附片奏聞道光二年八月初四日後銜與

前同

十五

奏爲奏聞事竊臣等奉敕恭修仁宗睿皇帝實錄前於開館時奏明約計四年之內告成查現在漢書二十五年稿本業經纂就黃綾本於明春可期進呈完竣清書亦可於秋冬進完茲據提調等查核謄錄功課統計清書漢書字數所有大內皇史宬盛京及內閣尊藏黃綾本並聖訓正副本於道光四年冬季均可繕竣臣等伏思告成之期雖與原奏相符惟黃綾本進呈後在館人員各項均無功課專俟謄錄繕完方能全局蒞事未免徒滋耽延糜費似應添設謄錄以期及早慶成臣等公同酌議擬添設清書謄錄二十八員漢書二十員額外行走仍責成提調督催趕緊恭繕務於道光四年春季全書告成再據蒙古提調詳查功課開館時因蒙古書向不恭繕聖訓暨盛京尊藏紅綾本是以僅設謄錄六十員較之清書謄錄少設二十二員今查蒙古書每卷篇頁繁多且俟清書纂成後方能辦理趕繕均須時日擬請添設額外謄錄四十員並額外收

掌官二員隨同提調督催以期與清書漢書同時歲事臣等公同商酌意見相同理合恭摺具奏是否有當伏乞皇上聖鑒訓示遵行謹奏道光二年十月日具奏本日奉旨

十六附單一片一

奏爲奏聞事竊臣等奉敕恭修仁宗睿皇帝實錄漢字黃綾本三百七十四卷前於四月內完竣其清字黃綾本現在亦經進完臣等伏查實錄紅綾本清漢字各四分蒙古字三分通計四千一百十四卷臣館前經聲明道光四年春季告成現在尅日趕辦不致有誤限期其聖訓黃綾本前經臣館奏定標目三十四門當經臣等率同署總纂官戚人鏡等恭於實錄並御製文集敬謹採輯以歸簡要現又酌增漕運屯墾二門共三十六門計一百十卷稿本均已成帙趕緊繕校擬自本月二十六日起依類分函每次清漢書各十卷一併陸續恭進仰稟聖裁再臣等恭查列聖實錄聖訓均有御製序文今臣館恭修仁宗睿皇帝實錄黃綾本已經進完聖訓黃綾本現亦次第恭繕理合循照成案恭請皇

上御製序文以便敬載卷首謹將聖訓門類標目繕寫清單恭呈御覽再總校
官祭酒彭邦疇侍讀學士鍾昌恭校實錄漢字紅綾本四分將次完竣辦理尙
屬認真所有聖訓漢字紅綾本四分仍責成該二員率同校對官等詳慎校閱
期臻完善合併聲明謹奏道光二年九月十八日奉旨依議欽此監修總
裁官大學士臣曹振鏞總裁官大學士臣戴均元總裁官休致大學士臣伯麟
總裁官協辦大學士臣英和總裁官禮部尙書臣汪廷珍副總裁官吏部尙書
臣文孚副總裁官吏部侍郎臣王引之副總裁官吏部侍郎臣杜堦副總裁官
工部侍郎臣周系英蒙古副總裁官禮部侍郎臣博啟圖

夾單

聖訓三十六門 卷數清單

聖德 三卷 聖孝 二卷 聖學 一卷 聖治 七卷 敬天 一卷 法祖 一卷 文教 一卷 武功
四卷 武備 附一卷 勤政 一卷 愛民 二卷 敦睦 二卷 澄叙 四卷 用人 二卷 理財 二
卷 求言 一卷 恤下 二卷 防海 三卷 治水 五卷 水利 附一卷 慎刑 三卷 恤兵 二卷

蠲賑三卷 緩貸附一卷 積貯二卷 漕運二卷 屯墾一卷 崇祀典一卷 訓臣工八卷
勵將士四卷 飭牧政一卷 嚴法紀十二卷 正制度八卷 褒忠節一卷 篤勳舊一卷
重農桑一卷 清奸宄五卷 綏藩服三卷 輯邊疆五卷

附片

再臣館上年八月蒙恩賞給議叙所有供事一項經吏部議叙歸於不論雙單
月升選二缺三缺後選用一人臣等以該供事等在館出力銓選壅滯不得不
量爲變通於本年二月將本館議叙一等中之尤爲出力者李逢諤等二十四
員奏請分發各省照例補用奉旨府經歷李逢諤等從九品王敏等未入流張
燁堂等俱著交部先行掣籤分發各省照例補用欽此旋經吏部議以仍留館
當差俟全書告成再行籤掣分發具奏奉旨依議欽此欽遵在案查該供事等
均係承值辦理黃綾書籍現在清漢黃綾本全數進完該供事李逢諤等既蒙
天恩准其分發現在並無經手事件自應仍遵恩旨飭部卽行籤掣省分照例
補用其未經掣簽丁憂者俟服闋後再行分發至承值辦理紅綾書籍供事人

等差使繁重應俟全書告成再行分別議叙理合附片奏聞請旨

十七

奏爲請旨事竊臣等奉敕纂輯仁宗睿皇帝實錄聖訓將屆告成恭查定例進呈實錄聖訓應有臣等恭進表文一道紀編摩之大略抒感慕之微忱其表文後應詳載臣等監修總裁總裁副總裁提調纂修收掌校對繙譯謄錄各官銜名大典攸關臣等未敢擅便謹擬表式恭呈御覽俟發下遵繕清漢合璧文於受書日敬謹捧進並照例分繕清漢蒙古文列入正本又此次奉皇上御製序文應恭載卷首次載凡例目錄銜名一併分繕黃綾本式四冊先行進呈再聖訓黃綾本前經臣館奏明分作十一次清漢各十卷陸續恭進其紅綾本四分俱俟御覽黃綾本發下發下後挨次趕緊繕校裝潢成帙擬俟黃綾本准完時臣館卽移會禮部轉行欽天監恭擇受書吉日奏請欽定其應行典禮應請飭交各該衙門查照舊例預期敬謹辦理合併奏聞道光四年三月初四日具奏本日奉旨知道了欽此與前銜同

奏爲據實保奏仰懇天恩事本月二十日仁宗睿皇帝實錄聖訓慶成奉上諭
監修總裁官正副總裁官暨提調纂校收掌繙譯謄錄等員與執事人等作何
議叙之處著該都查照舊例斟酌妥議具奏其筵宴賞賚亦著該部察例具奏
等因欽此仰見我皇上錫類推恩甄叙微勞之至意闔館人員無不感激歡忭
臣等查吏部則例內載特旨開設之館聽館臣擇格外出力者酌量保奏請旨
遵行等語查臣館出力人員提調官貴慶明達端勤始終盡力於館中一切事
務總理俱臻妥善提調官胡達源前於初次議叙經臣等保奏俟全書告成時
優叙該員爲人謹飭勤明辦事持正在館四載具見愜忱提調官裕泰實心任
事人品端方總纂官阿廉黃怡德承辦清字稿本詳慎妥速離館總纂官沈維
鑄麟慶前曾承辦漢字稿本細心編摩逐卷均經其手總校官容安曾充清字
協修於未挑乾清門以前在館專司譯漢考定清漢文義詳核對音均能妥協
嗣與法式尙阿恭校清字紅綾正本四分小心詳細總校官鍾昌彭邦疇恭校

漢字紅綾正本四分均能認真悉臻完善纂修官凌泰封邵正笏離館纂修官許乃普承辦聖訓漢字稿本盡心採輯詳酌體例亦屬認真署總纂官戚人鏡在館効力感激奮勉總輯聖訓漢字稿本依類分編進呈御覽均無舛誤又查蒙古提調官巴琿阿音德布總纂官景善承辦蒙古書籍敬謹迅速夙夜在公不辭勞瘁以上各員均係臣館出力人員例合據實保奏惟查提調官貴慶現係候補主事曾任二品大員總纂官沈維鏞總校官鍾昌彭邦疇均現任四品京堂總校官容安現任三等子爵乾清門二等侍衛提調官巴琿阿現係頭等侍衛曾任太僕寺卿該員等應如何量予加恩之處臣等未敢擬議恭候欽定提調官編修胡達源應請遇有應陞之中允司業贊善缺出卽行由部奏補禮部蒙古主事裕泰應請遇有該部滿洲蒙古員外郎缺出不論題選卽行升用免其試俸理藩院主事音德布應請遇有該衙門員外郎缺出不論咨留卽行升用免其試俸胡達源裕泰音德布三員可否先換頂帶之處恭候欽定纂修官編修凌泰封邵正笏許乃普請遇有應升之缺將該員等帶領在前引見候

旨升用總纂官刑部員外郎阿廉應請遇有該部郎中缺出不論題選卽行升用工部候補主事黃怡德應請遇有該部題選主事缺出卽行補用兵部蒙古員外郎景善應請遇有該部滿洲蒙古郎中缺出不論題選卽行升用總校官兵部員外郎宗室法式尙阿應請遇有宗人府理事官各部院宗室郎中缺出卽行升選以上四員均請免其試俸總纂官麟慶前由中允京察一等記名簡放安徽徽州府知府可否賞加升銜之處恭候欽定署總纂官臧人鏡前任翰林院侍講緣事革職特旨 在館效力應否酌量加恩之處出自皇上逾格鴻慈再查承辦漢字書籍纂修官均係翰林並未邀請初次議叙此時已無功課臣等擬卽遵例分別一二三等造具清冊移咨吏部查照嘉慶十二年高宗純皇帝實錄書成議叙超一二等成案辦理他館不得援以爲例其餘滿漢各員應俟皇史宬盛京內閣尊藏紅綾正本三分全行完竣再行核實辦理是否有當伏乞皇上訓示遵行爲此謹奏請旨

再查嘉慶十二年成案在館離館人員升任至二三品者其議叙等第開單請

旨遵行今臣館總纂官史致儼現任刑部侍郎纂修官白鎔現任內閣學士均已離館其議叙等第理合遵照成案將該員等在館年月開列清單恭候欽定謹附片奏聞

離館總纂官刑部侍郎史致儼

在館二年
六個月

離館纂修官內閣學士白鎔

在館一年
十個月

道光四年四月二十四日具奏奉上諭皇考仁宗睿皇帝聖訓實錄慶成曹振鏞等將在館出力各員據實保奏該館提調等官盡心編輯妥速成事均屬奮勉可嘉提調官貴慶著加恩以四五品京堂候補總纂官沈維鏞總校官鍾昌彭邦疇均著加恩給予一等議叙總校官容安著加恩賞給頭等侍衛提調官巴琿阿著加恩賞給副都統銜編修胡達源著遇有中允司業替善缺出卽由吏部奏補禮部蒙古主事裕太著遇有該部滿洲蒙古員外郎缺出不論題選卽行升用並免其試俸理藩院主事音德布著遇有該衙門員外郎缺出不論咨留卽行升用並免試俸均無庸先換頂帶纂修官編修凌太封邵正笏許乃

普均著遇有應升之缺帶領在前引見候旨升用總纂官刑部員外郎阿廉著
遇有該部郎中缺出不論題選卽行升用工部候補主事黃怡德遇有該部題
選主事缺出卽行補用兵部蒙古員外郎景善著遇有該部滿洲蒙古郎中缺
出不論題選卽行升用總校官兵部員外郎宗室法式尙阿著遇有宗人府理
事官各部院宗室郎中缺出卽行升選以上四員均免試俸總纂官現任安徽
徽州府知府麟慶著賞加道銜署總纂官戚人鏡著加恩賞給翰林院檢討其
升任離館之侍郎史致儼內閣學士白鎔俱著給予二等議叙以示獎勵餘依
議欽此

十九 附呈一

具呈提調官貴慶胡達源裕太音德布總纂官阿廉黃怡德景善總校官法式
尙阿纂修凌太封邵正笏呈爲懇請代奏恭謝天恩事竊職等識殊謏陋才媿
迂疏探渤海之宏深豈能蠡測繪圓穹之廣大竊効管窺何足颺贊勳華導揚
謨烈分光藜火惟虞掃葉之疎曩職微垣敢謝披芸之久心力漸于玩惕歷四

載以方周報稱本屬消埃洵萬分之何補而乃微勞必錄闔惠旁專恩逾格以
過加寵非常而尤悚亨衢直上九萬里已仰近雲霄佳話新添十八人徧霑雨
露凡此叨榮而無已實爲揣分以難安惟有益勵愜忱速期完歲以仰副聖主
高厚鴻慈於萬一所有職等感激下忱謹呈懇請代奏謹呈

奏爲據情代奏恭謝天恩事本月二十四日內閣奉上諭皇考仁宗睿皇帝聖
訓實錄慶成據曹振鏞等將在館出力各員據實保奏該館提調等官盡心編
輯安速歲事均屬奮勉可嘉提調官貴慶著加恩以四五品京堂候補總纂官
沈維鏞總校官鍾昌彭邦疇均著加恩給予一等議叙總校官容安著加恩賞
給頭等侍衛提調官巴琫阿著加恩賞給副都統銜編修胡達源著遇有中允
司業贊善缺出卽由吏部奏補禮部蒙古主事裕太著遇有該部滿洲蒙古員
外郎缺出不論題選卽行升用並免其試俸理藩院主事晉德布著遇有該衙
門員外郎缺出不論咨留卽行升用並免試俸均無庸先換頂帶纂修編修凌
太封邵正笏許乃普均著遇有應升之缺帶領在前引見候旨升用總纂官刑

部員外郎阿廉著遇有該部郎中缺出不論題選卽行升用工部候補主事黃
怡德著遇有該部題選主事缺卽行補用兵部蒙古員外郎景善著遇有該部
滿洲蒙古郎中缺出不論題選卽行升用總校官兵部員外郎宗室法式尙阿
著遇有宗人府理事官各部院宗室郎中缺出卽行升選以上四員均免試俸
總纂官現任安徽徽州府知府麟慶著賞加道銜署總纂官臧人鏡著加恩賞
給翰林院檢討以示獎勵餘依議等因欽此今據貴慶等呈請代奏叩謝天恩
謹將原呈恭呈御覽謹奏道光四年四月二十五日具奏本日奉旨知道了欽
此

二十

奏爲奏聞事竊臣等自嘉慶二十五年九月開館以來自監修總裁以下每月
支領桌飯銀兩現在實錄聖訓於四月二十日告成所有清書漢書蒙古書纂
修繙譯各員並無功課其應領桌飯銀兩擬於本月二十九日停止查盛京皇
史歲內閣紅綾本三分尙有繕校未完功課約計七月間可以蕝事所有校對

膳錄應領桌飯銀兩擬卽於七月二十九日停止至提調官等均有在館承辦事宜應准其照常支領至封館時停止其恭送盛京尊藏書籍之纂修官等桌飯銀兩應俟差回後停止供事及匠役人等亦准關支以示體恤至臣等頻年素餐滋媿復蒙懋賞洪施所有桌飯銀兩請一併停止關領除分別造冊知照各衙門外臣等仍督令在館各員敬謹趕辦務期妥速完竣仰副聖懷謹奏道光四年四月二十八日奏奉旨依議欽此

二十一

奏爲恭覆恩命事臣等奉旨派出恭填仁宗睿皇帝實錄廟諱並恭繕御名謹擇於本月二十八日卯時詣實錄館敬請盛京皇史宬尊藏實錄聖訓紅綾本二分查清文漢文蒙古文書內應恭填廟諱五處恭繕御名九百五十三處臣等恭設香案朝服行禮敬謹填寫督同提調官等包封訖理合具摺覆奏

二十二

奏爲奏聞事臣館恭纂仁宗睿皇帝實錄各分黃綾本現據次第尊藏所有清

光緒庚子辛丑電報

軍機處檔

兩江總督劉坤一等電

光緒二十六年十月十四日

萬急西安行在軍機處鈞鑒前聞洋兵西徧已抵井陘太原戒嚴宣化居庸等處洋兵不少晉防萬緊坤一之洞迭電各出使大臣各外部勸阻彼族均涉推宕連接各處電報外人總以懲辦禍首未能滿意毓賢董福祥尤爲各國所切齒聞已預備哀的美敦書尤之則必有爲難拒之則立致決裂時局至此恐終歸於不能不允坤一等竊謂此次議款當握定不失自主之權爲第一要義賞功罰罪中朝自有權衡本非外人所得干預肇禍諸臣縱匪滋擾貽害國家得罪於宗廟社稷乘輿播遷備嘗艱險得罪於皇太后皇上大局岌危生靈塗炭得罪於天下人民圍攻使館妄殺洋人得罪於海外諸國種種罪戾擢髮難數卽令諸臣自思當亦無顏再生於堯舜之世卽無各國要素當亦不能倖逃於祖宗之法聖朝忠厚兩宮仁慈或念其隨扈微勞不忍遽罪重典似不宜令其再竊高位再誤國是擬請斷自宸衷明降諭旨將載瀾趙舒翹英年一併革爵

革職剛毅查辦拳匪語多縱庇雖已病故仍請革職毓賢董福祥情節最重法無可貸請立正典刑董福祥現在調回甘肅或俟抵甘後再行治罪伏候聖裁一面速發國書措詞務從謙婉切懇各國迅發訓條和平開議或冀早就範圍與其待彼書到迫以必辦損我國體何如趁書未到先行自辦伸我大權事機危急諸臣罪有應得坤一等不敢徇外人之好惡不敢不爲朝廷整紀綱謹冒死瀝陳請代奏劉坤一張之洞同肅元

河東河道總督任道鎔電

光緒二十六年十月十五日

西安軍機大臣鈞鑒道鎔於初十日接西安電奉旨錫良奏廷所部振遠各營在順德易州一帶餉絕將潰直隸庫款由道員葉元琦運至汴省著于蔭霖派得力鎮道會同葉元琦馳往順德易州將振遠各軍發給兩月餉項一面認真裁汰分別去留如于蔭霖尙未到任卽著任道鎔遵照辦理欽此遵卽傳知葉元琦旋據稟稱振遠親軍三營兩旂左營護餉到汴中右兩營分紮磁州順德所有餉銀已發至十月底並無虧欠尙有六營聞移駐易州蠡縣一帶礙難前

往昨奉北洋大臣東電將餉銀解赴大名存庫派砲船至道口接運撥放等語道鎔以爲順德以南振遠四營兩旂係晉州知州劉番統帶既無欠餉應暫時紮定飭劉番酌裁正定以北六營遷移不定葉元琦未便運餉輕進至有貽誤已飭葉元琦將存汴餉銀即日運往大名候撥一面電知李鴻章查明振遠六營遵旨給餉分別去留較爲穩妥請代奏道鎔文

全權大臣奕劻等電 光緒二十六年十月十五日

西安軍機處據俄德英義奧日本日比八國先後照會稱八月二十六日上諭加賞李秉衡之子孫以示篤念忠貞查忠貞之臣加恩酬賞自屬理所當然但此次李秉衡故後恩卹殊令輿情趨人歧途政府諸臣雖明與各國重商結好恐仍存如李秉衡顯恨泰西之心李秉衡夙與西人爲仇由南省北來途次督拳民攻燬教堂迨入京後圍攻使館極力加功大臣有與泰西輯睦者附和僉人而陷害之其死也乃與救使聯軍對敵所致如斯忠貞果爲國乎必應力□駁辯□請嗣後勿再降此項諭旨等語查李秉衡在東撫任內虐待教士致有

膠州之失蒙恩降調不再起用今復令帶兵自贖徒有仇洋之志實無勝敵之方貽害君國死不足惜茲因明詔優卹廕後致騰衆謗現將開議和局萬不可敗應否俟其條款到時撤銷李秉衡卹典以示大公請代奏奕劻李鴻章寒

河南巡撫于蔭霖電

光緒二十六年十月十六日

西安軍機處中堂大人鑒蔭霖行程濡滯於本月初九日行抵南陽府屬裕州初十日在裕恭祝萬壽卽於是日接受河南巡撫關防仍遵程前進除俟抵省再行奏報外謹先電陳仰慰宸廑祈代奏蔭霖自裕州謹肅印

山東巡撫袁世凱電

光緒二十六年十月十七日

行在軍機處鈞鑒亥密迭據西北各州縣探報洋兵馬步砲隊數枝由津分搜直境滄州南皮東光慶雲鹽山各屬兩三日間悉爲洋兵佔據該洋兵行踪甚速意向叵測等語查該各屬與東境犬牙相錯處處接壤綿延數百里道路紛歧無險可扼東省駐防海疆營隊勢難抽調而西北分紮各營兵力甚單情形危急警報踵至現趕抽調三千人以備接應俟查看由何路進犯卽相機撥隊

迎禦是否有當伏候訓示請代奏袁世凱叩鈇

兩江總督劉坤一電 光緒二十六年十月十八日

西安行在軍機處鈞鑒奉初四日寄諭劉光才所統五營應支月餉卽著劉坤一籌解等因查劉光才一軍係駐紮江甯砲台奉調赴晉業經遵旨另募填紮並無餘項可節江南庫款支絀供億浩繁平時出入相抵本已竭蹶萬分軍興以後本省增募勇營驟增鉅款加以新增撥款如直隸三十萬購米連陝十五萬山西賑款五萬陝西賑款五萬並程文炳軍餉以及辦防一切費用無非移緩就急設法騰挪又復迫以洋款前期甫償後期踵至四國洋債蘇省派數本較各省爲多值此費絀用宏之際籌償尤屬爲難又有瑞記洋款本年加還本銀十一月一期陡增四十餘萬七處鹽貨厘金又因商困厘絀收不敷解由江海關按月原墊之外復由稅司代爲湊足兩期以後不敷之款稅司亦苦無款常墊現與再四相商尙無眉目一經愆期失信必致枝節橫生坤一持籌無計焦灼莫名因上悉宵旰憂勞未敢上陳宸聽劉光才所統五營月餉江南委實

無款代籌思維至再惟有仰懇天恩俯准在裁撤武衛右軍月餉項下按月動撥抑或飭部另行籌撥之處伏候諭旨遵行請代奏坤一洽

全權大臣奕劻等電 光緒二十六年十月十八日

西安軍機處各國條款大致商定德使忽謂臣等前奉全權電旨不合式不能開議請援照二十一年馬關議約奉有全權大臣用寶勅書以昭慎重與之駁辯再四堅持不允英俄日本皆從此議可否權宜酌辦由京恭錄諭旨在大內請用御寶臨時給閱免其藉詞延宕開議日期乞代奏請旨遵行奕劻李鴻章

諫

兩江總督劉坤一電 光緒二十六年十月十八日

西安榮中堂王中堂鑒接李星使電頃晤外部催開議據稱已電西德聞各國亦陸續知照駐使日內當可開議將來條款交出惟請中國政府早日定見以免遲延致生枝節至禁軍火款內各國尙欲禁製軍火之物料日廷不允頗招疑忌幾至解體譯言償款較大中國力不能支務請減少並寬定年限外部答

數目未定日本除實用兵費及應賠各款外斷不多索但各國所望頗奢屆時當酌量設法勸減等語謹電陳乞轉榮王兩相鐸諫云坤巧

全權大臣奕劻等電

光緒二十六年十月十九日

西安軍機處頃德使在美館覓出二十一年春派臣鴻章爲全權敕諭文云大清國大皇帝敕諭現因與大日本國重敦睦誼特援文華殿大學士直隸總督北洋大臣一等肅毅伯李鴻章爲頭等全權大臣與日本國所派全權大臣會同商議便宜行事豫定和約條款予以署名畫押之全權該大臣公忠體國夙著勤勞定能詳慎將事締結邦交不負朕之委任所定條約朕親加查閱果爲妥善便行批准特敕此稿樞譯無存鴻記憶不錯該使等謂必應照辦以昭鄭重擬將臣鴻章銜名上添寫臣奕劻銜名餘均酌量照繕蓋用御寶俟開議時交閱免再挑剔延閣條款尙未得見聞懲禍首一條經美俄日執論改請加重懲治尙有等差此外隨有創格似非必不可行祈代奏請旨俟開議有日再詳報奕劻李鴻章洽

全權大臣奕劻等電 光緒二十六年十月十九日

西安軍機處頃據英薩使照稱浙撫劉樹堂因衢州教士被害案去任藩司惲祖翼接任該藩司顯恨西人較劉撫尤甚不應令其接替請一體屏退並凡有交涉之缺不再補放且請將劉撫留浙俟關係英教士案內各員處分定後再聽離省等語查自今夏拳匪肇亂各省教案迭出操縱兩難浙東民氣淳動攻教尤甚劉惲非必與洋人爲仇辦理或有未當之處該使聽領事等一面之詞持論過激不易調停應如何處治伏候聖裁請代奏奕劻李鴻章嘯

全權大臣李鴻章電 光緒二十六年十月十九日

西安軍機處俄主爵吳克托穆前月抄到京與談時事甚代焦急近聞俄主病已漸愈謂我皇應致電慰問並謝交還東三省之事伊知此事實由俄主重睦誼顧大局臣下不盡願從然權自主操得我皇一言道謝彼更欣然主持使各國有所觀感必有覆電允諾可爲證據鴻因與吳商擬國電稿敬呈御覽如蒙飭行卽由京譯發洋文電徑遞黑海行宮免由彼得堡轉外部稽遲鴻一面電

知楊使並電盛宣懷俟俄主洋文回電過滬照譯漢文轉奏請代奏候旨遵行
李鴻章嘯國電文曰大清國大皇帝敬問大俄國大皇帝好喜音遠來欣悉大
皇帝已經康復因行赦遠離海口前此大皇帝抱恙朕一有所聞卽著楊儒傳
旨致候蓋自本國近遭大難以來重荷鼎力援助是以大皇帝起居實與本國
休戚相關前聞大皇帝宣播德意力保中國土地全權近於滿洲地方一意重
使太平並准將東三省地方交還中國官吏俾各官得以治理地方之事查滿
洲爲本朝發祥之地祖宗陵寢所在故朕尤覺喜隘五中感銘肺腑今大皇帝
有此聖明公正之舉關繫大局良非淺鮮足增大皇帝盛世之光乘此機會我
兩國鄰邦交誼益臻親密仰托昊天降佑我兩國定能永享昇平之福以後誠
信交孚緩急相助也光緒二十六年十月

安徽巡撫王之春電

光緒二十六年十月二十日

西安行在軍機處王大臣鈞鑒亥十月十八日之春奉電傳諭旨總兵李南華
游擊劉應貞著王之春岑春煊卽飭該員等迅速赴汴交于蔭霖差遣委用等

因欽此查該總兵李南華現在皖省統領威靖馬步等營當即派員接統該軍飛飭李南華遵旨迅速起程赴汴聽候差委伏乞代奏王之春謹叩

兩江總督劉坤一電

光緒二十六年十月二十日

急西安行在戶部鈞鑒奉十四日寄諭陝省災重江蘇漕糧二十萬石著迅速設法分路起運等因欽此伏查餘漕運陝嚴催委員赴漢口設局運解已據報於九月二十六等日起運兩批米一萬二千五百石因襄河目下水淺大船不能行小船無多轉運局同時僱用即加價亦驟難招集老河口以上船尤小荆紫關以上需騾駝約計運費每石需六兩左右蘇省庫款已竭無法可設現在行在望米迫切理宜力籌擬飭糧道設法分路趕運十萬石白糧一萬石稍資接濟照司道詳運費約需六十餘萬先以新漕漕項湊給擬請將新漕改折三十萬石以補運陝經費之不足折征之過寡視運陝多寡爲增減若不先籌運費嚴催無益萬不得已冒昧上陳除恭摺另奏外先乞代奏請旨坤一緝熒效

浙江巡撫惲祖翼電

光緒二十六年十月二十一日

加對急西安軍機處中堂大人鈞鑒亥祖翼受篆後清理衢案霍領事之意首須辦有罪之官次抵償次撫卹而鮑革道首先脫逃兇犯僅數人有供致卹欸亦難開議前在藩司任內曾派員分路緝拏旋接電稟已在常州將鮑革道查獲連日嚴督臬司首府各員晝夜熬審供認殺洋人者已有十五六人續拏到案者尙不少擬卽次第料理彼請正法之官尙有喻革鎮俊明洪革守思亮昨又添出城守周之德指拏人犯尙有實係無辜者已照會辯論並切託盛京卿在滬力與磋磨殊爲棘手卹款必鉅緣教士被戕男婦實有十一人也霍領事經江鄂兩督再三勸解已允不發兵至杭祖翼前在漢關共事亦尙相得盡心補救或可漸就範圍甯紹土匪竊發時有劫案深慮蔓延已選派得力將領會合各路防營認真拏辦總期地方靜謐民教相安上答聖恩下酬知遇恐繫灼懷謹注謹先電達餘再詳陳祖翼謹叩

山西巡撫錫良電

光緒二十六年十月二十一日

行在軍機大臣中堂大人鑒由頃接吳匡等稟鈔獲鹿縣致井陘縣信云晤法

毆總辦稱井陘晉軍不得至獲鹿附近之處等語當電覆彼以獲鹿附近爲界
我以東天門附近爲界各勿相越共敦睦誼又接劉光才電稱我軍在東天門
築卡昨午洋兵七十餘名教民二百餘人在白王庄放排槍三次大炮二十餘
子過關頭兵民未傷我軍堅持不動彼復回獲鹿等語囑以彼□挑畔我仍宜
嚴防堅守毋越界第將開議還擊則礙和局忍讓太過將士銳氣消磨不戰則
退勢必長驅直人大局何堪設想策之萬全懇乞代奏訓示遵行錫良叩賀

盛宣懷電

光緒二十六年十月二十一日

行在戶部王中堂鹿大人亥前月奉慶親王李中堂諫電據總稅務司節略云
稱此次和局告成中國必有賠款無論何項辦法四五十年內每年須籌出約
三千萬兩各關洋稅全經抵償並劃撥七處厘金新認賠者須指他款此時亟
須查明進款出款兩要端一係將各省地方厘金鹽課常稅逐細查明每年報
部若干究竟能徵若干查出實數毫無含混進款已得其實二查出款各省每
年辦公之費每省向須若干其中何項可省何項必不可省究竟實需若干亦

逐款查明出款亦得其實實數既得明晰丝毫不漏庶議和時較易取信若不令各國自定辦法則須中國豫籌善策等因希由貴大臣電知各省按照指查各節將進出各項實數認真查明迅速電復敝處及戶部勿遲勿漏云當卽分轉各省現已復到一半大約照常進出均屬有絀無盈誠如峴帥復電竭澤而漁斷難籌此鉅欸想中堂大人必已預籌大局以免戶政爲外人干預也宣懷

陝甘總督魏光燾電

光緒二十六年十月二十一日

行在中堂大人鈞鑒亥光壽奉命調滇業於十八拜摺謝恩並籲懇俟崧督到任交卸後趨赴行在陛見數日來見路小梗頃始傳到十五日諭旨令卽來行在陛見等因欽遵趕緊清釐經手尅日委護交卸起程懇請先行代奏魏光燾
謹叩箇

浙江巡撫惲祖翼電

光緒二十六年十月二十一日

急西安軍機處中堂大人鈞鑒亥接准駐京全權大臣電開英使照會以溫州

六月寇亂統領范銀貴前護鎮胡碩功顯與西人爲仇擬請革職永不叙用現和議將成未便因此齟齬請將該二員奏參革職等語臣查范銀貴胡碩功聲名本劣前值温州匪亂保護不力幾釀事端大局攸關未便姑容擬請旨將副將范銀貴游擊胡碩功卽行革職永不叙用以肅軍紀而弭釁端因具摺延緩具電奏聞請代奏祖翼謹叩號

全權大臣奕劻等電

光緒二十六年十月二十二日

西安軍機處前據英使照稱温州武員與教爲仇致滋事當經電知浙撫茲接惲撫覆統領范銀貴護鎮胡碩功聲名本劣已撤差參辦又衢州教案屬盛宣懷與滬領事調處擬嚴辦是惲撫於交涉尙能盡心並無顯恨西人自應無庸屏退卽商英使知照請代奏奕劻李鴻章馬

浙江巡撫惲祖翼電

光緒二十六年十月二十二日

加對急西安軍機處中堂大人鈞鑒亥十九電旨謹已接讀衢州教案事情重大祖翼接撫篆後首先訪明在逃之革道鮑祖齡密拏到案此爲西人所最注

意革守洪思亮在省候訊革鎮喻俊明城守周之德亦經次第□提聞霍領事開有一單牽及紳士尙未交來至獲到兇犯近日嚴督各員日夜熬審已有確供者近二十人仍隨時續拏歸案詳訊被戕英美教士十一人又毀壞什物應議撫卹賠償之款辦理諸形棘手前因英領事霍必昶在滬必欲帶兵赴浙尋覺情形十分喫緊祖翼諄託鐵路大臣盛宣懷再四排解費盡唇舌始得阻止復經江鄂兩督續爲開導盛宣懷久辦交涉忠信素孚與各國領事均極浹洽此案枝節太多誅求必甚收束實屬不易盛宣懷相機辯論定能中其窾要祖翼惟有殫心極慮隨時商榷遇有爲難之事相與孰籌辦法由盛宣懷就近設法磋磨力求妥善但期早結一日卽少耽一日之憂遵將前後情形擇要具陳以冀仰慰聖懷請代奏祖翼謹叩馬

山東巡撫袁世凱電

光緒二十六年十月二十三日

急行在軍機處鈞鑒亥恭奉篠電諭旨跪讀欽遵當洋兵竄逼東邊時卽飛飭各邊吏多立界牌派人守候界外遇洋兵窺伺卽告以東省自任保護彈壓現

地方一律安靜鐵路礦務均已開工傳教洋人亦陸續歸來倘客兵入境激成
衅端全省必將糜爛中外民商同遭損害本省不能任其咎責等語剴切詰阻
一面分電京滬烟台青島各洋員反覆理論旋接青島德員及駐京德使先後
轉到聯軍總統瓦德司電稱兵隊刻已調回不入東境云查該洋兵僅抵德州
樂陵兩邑界牌外折回未越東境一步連日接各處探報洋兵於二十日全隊
退過滄州前佔直屬南皮東光吳橋鹽山等城均經退出惟敵情變詐蓄志叵
測謹當遵旨穩慎因應仍飭將吏隨時防範並將境內各洋人妥加保護免其
藉口仰副朝廷固圉綏疆至意請代奏袁世凱叩漾

江蘇巡撫松壽電

光緒二十六年十月二十三日

西安行在軍機中堂大人鈞鑒亥敬乞代奏現已交卸江西惟念蘇省繁劇人
地未宜瀝陳下情仰祈聖鑒事奴才賦性迂拘雖於尋常洋務尙能因應現值
和議將開外人橫肆蘇地緊要若稍治兵自固恐致梗和若弛備不修又恐招
侮督臣劉坤一威信爲外人所服措置自如奴才驟莅重任動輒皆恐有礙人

地實有未宜與其貽誤於後莫若自貢於前當此時局艱危受恩深重所慮不在一身而在大局務求天恩賞予開缺另簡賢良奴才三次奏請入衛未奉俞旨自聞兩宮蒙塵攪心鉅痛罕知所措亦恐誤公急求奔赴行在以効犬馬不勝迫切之至謹奏壽漾

浙江巡撫惲祖翼電

光緒二十六年十月二十五日

西安軍機處中堂大人鈞鑒亥衢州城守營都司周之德平日治軍毫無紀律六月匪亂城廂地面出有戕教戕官重案該都司有地方之責救護不力並據英領事口稱該都司在場鼓舞喝令肆殺難保不有意縱容並聞有妄殺無辜情事擬請旨將該督司周之德先行革職歸案訊辦因案情緊要專電奏參請代奏祖翼謹叩有

盛宣懷電

光緒二十六年十月二十五日

行在榮中堂王中堂趙大人鹿大人前准江督蘇撫咨奉諭旨飭令嚴作霖邀集同志來陝辦理義賑並飭宣懷勸募匯解以資接濟正在籌辦間頃奉敬電

命卽設法勸捐先行籌款若干卽交嚴作霖隨帶赴陝辦理急賑查嚴作霖前日來滬會商當卽傳集向來勸捐之紳商婉切籌酌皆稱北方大亂南人財貨消耗無算淞滬敵艦陸兵不絕於道商務停滯無可勸捐卽如宣懷所管之輪船電線不僅入不敷出且產業或毀或奪幾難自保實非往年可以激勸而得鉅款此皆實在情形况勸捐緩不濟急必須先行墊款頃已設法籌墊現銀拾叁萬兩內計輪電局貳萬嚴信厚施則敬嚴作霖各籌墊壹萬聶護撫交嚴作霖協賑壹萬宣懷向聶護撫借壹萬向滬關借伍萬余藩司聯沅捐助壹萬尅日解赴漢口交嚴作霖隨帶赴陝據岑撫電擬奏懇實官請獎請速發照收以便馳電各處勸捐一面歸補一面接濟惟嚴須冬月杪到陝急賑萬不可待前已電復岑撫必須遴員先辦官賑仍仿照義賑辦法派員查戶分別極貧次貧隨查隨放不可全憑董保造冊吏胥過手放賑無他法剔得嚴方能放得寬查得快方能救得活聞京官陸續到陝或選擇樂善耐苦京外官皆可分赴各縣查放不拘官賑義賑皆好嚴到再擇極重州縣令辦加賑庶免延誤除具摺覆

陳外請先代奏宣懷謹叩敬

浙江巡撫惲祖翼電

光緒二十六年十月二十五日

西安軍機處中堂大人鈞鑒亥衢案奉旨派盛宣懷會辦謹與妥商早圖了結此案戕殺英美教士男婦共十一人內七人係於六月二十五日與西安吳令同時被戕巡道署內其四人由常山道路至衢州城外同日被戕專電陳明請代奏祖翼謹叩敬

兩江總督劉坤一電

光緒二十六年十月二十五日

加對西安行在軍機處鈞鑒敬電悉陝省奇莢必須籌辦急賑現已會商盛京卿在江海關借撥五萬兩並由盛京卿等另借五萬共成十萬交嚴紳作霖帶陔辦理急賑該欸由盛京卿等勸捐歸還至皖贛鄂湘等省卽當分電諄囑通籌接濟坤有印

全權大臣奕劻等電

光緒二十六年十月二十六日

西安軍機處宙羅豐祿電卽將開議英薩使謂必須戮王公數人前已迭告謔

親不能加誅今復反齒夜長夢多請代奏奕劻李鴻章徑

全權大臣奕劻電

光緒二十六年十月二十七日

西安軍機處鑒鑲白漢都統副都統均隨行在旗務印信需員管理請旨簡員署理希代奏前細陽電想有阻滯茲再電請慶有

江蘇巡撫松壽電

光緒二十六年十月二十九日

西安行在軍機處鈞鑒十月二十五日行抵安徽奉敬電奉旨松壽卽著前來行在陛見欽此遵卽由漢口西上請奏代壽沁

全權大臣奕劻等電

光緒二十六年十月二十九日

西安軍機處頃由俄使格爾斯交來俄主覆電文曰俄國大皇帝覆電前承大皇帝因朕躬痊安電內所表之情誠爲鳴謝朕夙益中國之心如何重大大皇帝視爲珍重由是欣然深見惟望大皇帝亦百方圖謀以冀卽速盡復兩國夙誼此覆云請代奏奕劻李鴻章沁

奏報米價摺 康熙五十三年正月二十日

臣李煦跪奏竊新歲正月以來天氣晴明萬民歡悅樂太平之盛世祝天子之萬年而黃童老叟俱歌聖壽之無疆也各路米價照常仍賤上號不出一兩次號不出九錢理合奏聞蘇州揚州五十二年十二月晴雨冊進呈伏乞聖鑒康熙五十三年正月二十日

硃批知道了

奏報春雨如膏米價仍賤摺 康熙五十三年二月初七日

臣李煦跪奏新歲以來天氣晴和至正月二十四五等日春雨如膏二麥秀發百姓樂業地方寧靜各路米價照常仍賤理合奏聞蘇州揚州正月晴雨冊進呈伏乞聖鑒康熙五十三年二月初七日

硃批知道了京中近日少雨四外好雨足了

奏賀萬壽摺 康熙五十三年二月二十五日

臣李煦跪奏竊我萬歲文武聖神四海永清之福主聰明睿智萬年有道之仁

人合芝草以增輝殿陛榮敷堯莢映慶雲而呈瑞薇垣星朗長庚恭逢三月十八日萬壽聖誕普天稱慶更勝康衢之祝臣煦以包衣犬馬惟有喜極而舞敬設香案望闕叩頭遙祝聖壽無疆仍率兩淮商人於天寧寺江天寺高旻香阜靜慧等寺誦經禮懺伏願萬歲甲子綿綿日升月恒齊壽春秋億億天長地老遐齡而臣煦遭逢聖主長沐恩榮固與向陽草木沾光無盡矣臣煦着妻韓氏子以鼎進京叩祝外謹具摺奏賀伏乞聖鑒臣煦臨奏何勝踴躍懼忭之至康熙五十三年二月二十五日

奏保運使李陳常署理鹽院摺康熙五十三年三月初一日

臣李煦跪奏竊臣包衣下賤蒙恩以織造輪視淮鹺經今十年雖捐糜頂踵未能報高厚於萬一而兩淮商人屢沐皇上格外矜恤蠲帑帶徵疊膺聖澤又特簡運使李陳常操守清廉撫字得法催科不擾協衷調劑俾國課日裕商困日甦衆商歡呼莫不感激皇上簡用運使得人之洪恩也臣等十載之差今冬已滿除歷年正徵帶徵俱已完足所有癸巳綱正課錢糧現在督徵其帶徵各項

俱可全完斷無欠缺惟淮鹽一百六十餘萬引本年不能全運必至下年四五
月方能掣完歷來如此謂之套搭數年以來雖藉運使督運有方漸免積滯而
套搭日久未盡疏通必得熟諳之人接任經理不寬不迫加意撫恤庶鹽無停
壓積弊可除是以衆商赴臣衙門求臣保題運使李陳常量加職銜署理兩淮
鹽院三年以一人兼攝院道則事權不分三年之內次第整頓引鹽可以年運
年銷永無套搭之患兩淮之元氣培養益深至每年節省織造銀二十一萬兩
衆商情愿照數公捐入庫仰報皇恩等情臣思李陳常居官清正久在聖明洞
鑒之中且看守錢糧現有成效若使之署理鹽院三年事出一手裕課培商實
可勝任而鹽法肅清不致壅積但不次用人之大典出自宸斷臣何敢冒昧具
題因兩淮錢糧重大鹽法攸關衆商呼籲情切臣不敢壅於上聞謹將呈詞抄
錄呈覽伏乞聖裁批示遵行康熙五十三年三月初一日

硃批此事非爾可言

奏春雨時降並報米價摺康熙五十三年三月十一日

臣李煦跪奏竊蘇州二月內春雨時降二麥甚茂至於揚州一府二月雨澤頗少今幸三月初七日大雨竟日麥苗驟長四月仍可豐收萬民甚爲喜悅所有蘇州揚州二月晴雨冊進呈御覽再各路米價照常仍賤上號不出一兩次號不出九錢理合一并奏聞伏乞聖鑒康熙五十三年三月十一日

硃批知道了

奏四省重運糧船過揚北上並報米價摺康熙五十三年四月十一日

臣李煦跪奏竊江南浙江湖廣江西四省重運糧船經過揚州北上已有五千二十隻尙有湖南二幫九江二幫南昌一幫共五幫糧船未過揚州約數有五百餘隻地方官現在催趕隨後陸續可到矣蘇州揚州二麥近山近水俱得豐收各路米價仍賤上號在一兩之內次號在九錢之內再蘇州雨水調勻揚州雨澤亦不至缺少理合奏聞所有蘇州揚州三月晴雨冊進呈伏乞聖鑒康熙五十三年四月十一日

硃批京中原不少雨畿南四府併山左雲中時雨未足近來亦有雨了但二麥

未免減收

奏代呈撫臣張伯行奏摺 康熙五十三年四月二十一日

臣李煦跪奏竊江寧巡撫臣張伯行以二麥茂發具摺奏聞奉御批已後倘有緊要事爾家人恐有遲悞交與李煦速來撫臣張伯行錄示旨意欽此欽遵今張伯行有奏摺交臣臣煦謹遣家人代爲進呈伏乞聖鑒康熙五十三年四月二十一日

硃批知道了

奏撫臣查拏散帽黨徒及妖術叫魂案摺 康熙五十三年五月初七日

臣李煦跪奏竊有陝西人至蘇州府松江府等處賣藤涼帽不要現錢肯賒與衆人撫臣張伯行因其異省之人遠來散給帽子未必不是結黨聚衆謀爲不軌之徒現在查拏發府縣官究審尙未得其確實口供又近日江寧府高淳縣內有一種奸棍竟用妖術喚人姓名勾攝生魂人不知妖術聞喚姓名一時答應卽立刻身死今府縣官密密緝捕已獲宋啟福等現在究審擬罪理合奏聞

伏乞聖鑒康熙五十三年五月初七日

硃批朕早已聽得如此爾還打聽確實奏聞

奏雨水調勻米價仍賤摺

康熙五十三年五月初七日

臣李煦跪奏竊湖廣江西浙江江南各省重運糧船陸續北上於五月初三日盡過揚州訖目下各路米價照常仍賤蘇州四月內雨水調勻揚州四月內雨澤雖有尙未霑足今幸五月初四初五連日大雨滂沱百姓十分歡悅處處莊農俱踴躍爭先趕緊插秧所有蘇州揚州四月晴雨冊進呈伏乞聖鑒康熙五十三年五月初七日

硃批知道了

奏雨澤缺少並報米絲價目摺

康熙五十三年六月初九日

臣李煦跪奏竊蘇州雨水調勻庄農插秧已完揚州自五月二十三日以後雨澤缺少其近水田畝栽秧已完山田之缺尙有二三分未栽如十日之內降有甘霖猶可趕緊插蒔無害農功也再揚州沿海煎鹽各場亦要雨水調勻竈戶

方能晒灰淋瀝就容易煎辦今亦因缺雨所以產鹽不多目下時已六月臣煦
尙未到儀真開掣近日各路米價上號在一兩一錢之內次號在一兩之內至
於新絲之價線經絲每兩八分五厘單經絲每兩八分一厘緯絲每兩七分七
厘理合奏聞所有蘇州揚州五月晴雨冊進呈伏乞聖鑒康熙五十三年六月
初九日

硃批知道了

奏甘霖大霈摺 康熙五十三年七月初一日

臣李煦跪奏竊六月以來蘇州揚州天時亢旱處處少雨以致民情旁皇日切
雲霓之望今六月二十九日戌時下雨起甘霖大沛竟夜不止田禾有救萬民
歡悅至於蘇州曾否一同得雨臣星飛遣人到彼察看隨後具摺奏聞伏乞聖
鑒康熙五十三年七月初一日

硃批知道了

奏請繼任鹽差摺 康熙五十三年七月初一日

臣李煦跪奏竊臣與曹寅蒙萬歲隆恩輪視淮甯殊榮異數亘古未有今十年差期已滿臣煦何敢再有非分之求但臣蒙蒙養數十年莫非宏恩覆庇而自今以後將有不得保全身家之懼若不據實陳奏以求聖恩是徒蹈欺主之重罪並負蒙養之弘慈此臣煦之所以不容不瀝誠籲請也臣巡視淮鹽每年所得餘銀供江寧蘇州現年織造錢糧並備辦差使以及日逐盤費外又代商人清補歷年積欠而兩淮庫項俱已清楚惟蘇州織造衙門向有虧空勢遂不能兼顧今鹽差已滿臣別無指望雖粉身碎骨終不得弭補蘇州織造虧空而錢糧關係臣心萬分惶懼是以望闕叩頭再求天恩於格外伏思巡鹽所得餘銀每年約五十五六萬兩不等內應發江蘇現年織造錢糧二十一萬兩代補商人積欠二十三萬兩除此以外存剩者止十萬餘兩矣今江蘇現年織造錢糧照常應付外至於補商欠之二十三萬兩自丙戌綱起沿及今年已經補完在庫明年無可再補倘臣荷蒙殊恩再賞差數年則此二十三萬兩臣不敢私自入已請允臣每年解送進京以備我萬歲公項之用其存剩之十餘萬兩臣思

曹寅虧空雖補其子將來當差尙慮無銀而臣於存剩之十萬餘兩內應幫助曹顥辦差銀若干兩伏候批示遵行其幫助曹顥之外所餘銀兩臣當陸續補蘇州織造虧空并辦臣現年差使而叩求萬歲之曲賜恩全保臣身家臣惟生生世世永矢犬馬之報効也臣煦臨奏不勝激切悚惶之至康熙五十三年七月初一日

硃批此件事甚有關係輕易許不得况虧空不知用在何處若再添三四年益有虧空了

奏甘霖連降今秋仍望豐收並報米價摺

康熙五十三年七月十三日

臣李煦跪奏竊六月以來揚州蘇州等府天時暑熱處處少雨禾苗急望甘霖幸六月二十九日戌亥時下大雨起至七月初一日寅時止蘇揚等府俱各相同而初二日以後至初七日蘇揚等府俱每日下大雨一次所以田禾有救現在生旺今秋可仍望豐收萬民並皆歡悅目下米價上號米賣一兩一錢四五分次號米賣一兩五六分理合奏聞伏乞聖鑒所有蘇州揚州六月晴雨冊恭

呈御覽康熙五十三年七月十三日

硃批知道了

覆奏訪明散藤帽叫生魂事摺 康熙五十三年七月十三日

臣李煦跪奏竊臣前以叫生魂散藤帽兩事具摺上聞奉御批朕早已聽得如此爾還打聽確實奏聞欽此欽遵臣查得江寧府溧水縣修造蒲塘橋忽有訛言云必要叫攝生魂幫修方得完工細究石匠實無此言一時訛傳不知從何而起凡隣縣百姓俱以叫生魂爲懼其溧水縣之隣邑高淳縣內有朱茂良之妻施氏三月初四日在家吃飯突有宋啟富到門求吃化飯施氏與之以米宋啟富舉手指畫施氏卽跌倒身死朱茂良趕回宋啟富令其救活而啟富叩頭拜禱施氏隨卽甦醒地方疑爲叫生魂之人解縣官審究刑訊之下宋啟富堅不承認在該犯雖不認叫生魂而施氏之忽死忽生必非無端是宋啟富之本有邪術可知但宋啟富之外亦有拿獲之人因百姓惶惑遇形跡稍有可疑卽爲擒住審皆無干目下宋啟富已斃獄中叫生魂之說亦絕無人再講矣至於

散藤帽一事據臣所訪陝西人春間販帽至南方散與舖家及至秋間又販皮貨復來方收春間所散帽銀再於明春販帽來南又收上年皮貨價值連環交易相率爲常而今春西人因交易之事與牙行角口牙人遂造出散帽結黨等語今撫臣張伯行提齊衆人羈候在監尙未查審臣煦謹遵旨奏聞伏乞聖鑒
康熙五十三年七月十三日

硃批知道了

查復撫臣張伯行怕人殺他事一怕海賊一怕仇人摺

康熙五十三年七月十七日

臣李煦跪奏臣奉諭旨蘇州巡撫怕人殺他晝夜不安命臣密密打聽一實信奏聞欽此欽遵臣查得撫臣張伯行一怕海賊殺他一怕仇人行刺竊江南意省叨蒙聖主洪福安居樂業欣逢太平之盛內地原無海賊不知撫臣是何全見謂蘇松內地藏有海賊其疑心已非一日今春陝西人販帽南來散與舖家因同牙人角口牙人遂造出販帽結黨等語撫臣不知其妄卽疑爲海上歹人又五月內蘇州城外黃天蕩地方偶有偷牛偷麥小賊皆因平時禁緝無方所

致而臨事撫臣又爲張皇遽指爲海上之人遂汎地添兵一面令府州縣官各
挑選快手健漢數名送至蘇城防衛反致驚擾地方又將蘇州城門早關遲開
百姓做生意的出入不便而愚民之從而倉惶者有矣撫臣旣疑慮處有賊便
恐禍至不測此怕海賊殺他也撫臣又云恨我之人甚多必遣刺客害我于是
將上年取中門生武舉人羅智張廷彪等招集衙門復揀本城善于拳棒打降
之徒環聚官署刻刻防閑此又怕仇人刺殺也六月內例同總督至常州府會
審秋決人犯撫臣竟不敢去再撫臣于蘇城內設立紫陽書院令生監進內講
學其中卽有獻媚小人撫臣不察賢愚卽寄之以耳目乃迎合其意或造言聳
聽或乘機恐嚇每至事端風起臣煦細察撫臣爲人大抵多疑多懼多疑則遇
事吹求不能就事完結自有無辜拖累而羅織多人矣多懼則中心惶惑小人
無稽之談盡爲腹心之托而晝夜不安舉動未免顛倒臣謹訪實遵旨奏聞伏
乞聖鑒康熙五十三年七月十七日

硃批是一點不錯此事要密倘有人知爾災非潛潛疑爲淺矣

奏產鹽地望雨心切並報米價摺 康熙五十三年八月二十一日

臣李煦跪奏竊蘇州七月內不復亢旱雨水調勻禾稻甚好揚州自七月十四日之後又少雨澤其田中禾稻因七月上半個月屢沛甘霖業已霑足所以無礙秋收將來仍自豐熟但沿海煎鹽地方因七月十四日起以至八月天時少雨遂缺水淋漚所以產鹽不多而目下望雨之心固甚切也江南百姓聞特旨留漕糧存貯各府俱說萬歲爺未雨綢繆愛我百姓到這個田地這是千古來沒有的我等何幸竟得遭逢聖主感激天恩歡聲動地近來各路米價上號的一兩四五六分次號的不過九錢幾分理合奏聞蘇州揚州七月晴雨冊進呈伏乞聖鑒康熙五十三年八月二十一日

硃批知道了

奏報妻韓氏病故臨危之際囑謝隆恩摺 康熙五十三年八月二十一日

臣李煦跪奏竊臣妻韓氏今年六十三歲忽於七月十日胸膈停食腹中下痢百般醫治總不能愈已於八月初六日申時病故臨危之際向臣涕泣說道

我雖女流頗知大義屢屢蒙萬歲天恩心中時刻感激目下我的病勢如此自然不能再見天顏的了但受恩深重不及親見兒子以鼎當差効力我死了魂魄是不安的我自願來生世世犬馬報答萬歲隆恩你要具個摺子把我感謝的意思代奏一奏等語言訖涕淚如雨又反覆叮嚀囑臣必要具摺理合奏聞伏乞慈鑒康熙五十三年八月二十一日

硃批知道了

奏刈稻將完並報米價摺

康熙五十三年九月二十日

聞李煦跪奏竊蘇州揚州入夏亢旱年歲恐致歉收後因得雨禾苗並皆驟發目下刈稻將完蘇州揚州仍得豐收民情俱皆安貼近日各路米價上號不出一兩一錢之內次號不出一兩之內雨水亦皆調勻蘇州揚州八月晴雨冊進呈伏乞聖鑒康熙五十三年九月二十日

奏謝李陳常鹽差餘銀補煦所欠錢糧摺

康熙五十三年九月二十日

臣李煦跪奏竊臣接閱京抄恭照兩淮巡鹽御史奉旨簡用李陳常又蒙萬歲

恩旨諭李陳常以餘銀補完臣煦所欠錢糧臣煦聞命自天感恩無地伏思錢糧虧欠例必變產賠補本身仍置重辟此煌煌國法也但臣煦欠項雖粉身碎骨不能弭補而錢糧關係重大自思此身萬無生理所以晝夜恐懼刻下自安今乃蒙萬歲大仁大慈賜千古未有之特恩命李陳常代補虧欠既全臣之家產復恕臣之死罪臣實夢想之所未到一旦驚聞恩旨臣心感激之切惟有涕淚如雨不但此後餘年皆我聖主之再造自當竭盡頂踵卽生生世世長効犬馬之力亦不足以報天恩於萬一也臣煦恭設香案望闕叩頭謝恩外理合具摺奏謝伏乞慈鑒臣煦臨奏可勝感戴悚惕之至康熙五十三年九月二十日硃批知道了

奏報米價摺 康熙五十三年十月初六日

臣李煦跪奏竊蘇州揚州九月以來天氣晴和莊家收割全完地方寧靜百姓樂業上號米每石一兩四五分次號米每石九錢二三分理合奏聞所有蘇州揚州九月晴雨冊進呈伏乞聖鑒康熙五十三年十月初六日

硃批知道了

代李陳常謝恩並請准李具摺奏事摺 康熙五十三年十月初六日

臣李煦跪奏竊兩淮鹽課關係重大自蒙萬歲特恩將李陳常補授運使三年以來積欠錢糧俱得清補今又欽奉特旨將李陳常授爲御史巡視兩淮鹽課茲據李陳常稟稱微末小臣仰蒙聖恩至於此極聞命之日已望闕叩頭謝恩訖俟接到勅印自具疏奏謝外所有感激之私懇臣先爲上達天聽理合奏聞再據李陳常稟稱陳常一介書生荷蒙皇恩高厚身以鹽法重任實深悚懼到任之後必得用摺以時奏請聖訓方可遵循無悞懇一併請旨定奪等情到臣合併奏聞可否俯准李陳常具摺伏乞聖裁康熙五十三年十月初六日

硃批准具摺

奏鹽差任滿俟冊籍造竣後卽詣京陛見摺

康熙五十三年十一月十六日

臣李煦跪奏竊臣於十月十三日鹽差已經滿任現在遵照定例查造復命冊籍俟一告竣卽星飛詣京陛見天顏叩謝萬歲隆恩也近日蘇州揚州等處米

價照常仍賤地方無事百姓樂業謹將蘇州揚州十月晴雨冊進呈伏乞聖鑒
康熙五十三年十一月十六日

硃批知道了

奏起身進京日期並着家人進呈李陳常摺件摺

康熙五十三年十一月十六日

臣李煦跪奏竊臣鹽差已滿理應進京復命現在于十一月二十六日自揚州
起身矣新任鹽臣李陳常奉旨准其具摺今有摺子奏聞但李陳常初次具摺
家人未諳進呈特懇臣差人賫奏臣謹着家人同李陳常家人恭賫奏摺進呈
御覽伏乞睿鑒康熙五十三年十一月二十六日
硃批知道了

英教士楊格非在漢口被毆案

英欽差威妥瑪知照英教士在漢口被毆情形照會

光緒二年二月二十六日

大英欽差駐劄中華便宜行事大臣威爲照會事照得茲據本國駐劄漢口護理領事官阿前後詳稱近有本國人等在漢口附近地方無故被毆曾與漢黃德道往來照會併將一切文卷抄呈前來本大臣富查本年正月初七日有本國教士楊格非偕同教堂醫士馬根和往孝感縣地方距縣城約二十里遠之魏家灣行至周家河離魏家灣尙有四五里之遙忽有鄉民蜂擁前來成羣毆打拋擲土塊楊教師馬醫士均受擊傷伊不得已返身而回鄉民始行歇手隨經楊教師查得滋事爲首之人乃係周么灣張新春小張家灣容喜管家灣管端等阿領事官據情照會李道轉扎地方官遵照曾經孝感縣令略爲查辦並出示諭一道已由阿領事官抄呈前來合將全案文卷併告示一紙轉爲錄呈貴親王鈞閱查孝感縣示諭所載本與實在情形不相符合惟阿領事官旣於二月初二日照會李道公文內聲明在楊格非馬根知皆爲傳教牧師遵守耶

穌教恕道克己待人不忍視滋事之人受嚴治之罪倘能保嗣後斷不再生事
端此案卽就此了解等由本大臣尙無須催請將爲首滋事之人查拿究辦惟
思鄉民聚衆滋事毆擊外國人士而該處知縣仍指以爲幼童撿取土塊互相
拋擲爲戲因而誤傷各等因殊非實在情形此卽無論何處地方官凡外國人
遇有受損被辱各案相習成風之恒情舉凡背違條約巨細各端無不由此而
生本大臣若於斯事緘默豈謂克盡厥職哉爲此照會貴親王請煩查照可也
須至照會者右照會大清欽命總理各國事務和碩恭親王一千八百七十六
年三月二十一日丙子年二月二十六日計粘抄一紙

英教士楊格非被毆全案文卷鈔單

原件附光緒二年二月二十六日英
欽差威妥瑪照會內

照抄照覆江漢關監督李文稿

爲照會事因有英國人在貴治地方被人無故滋鬧欺打合再爲貴監督言之
查有本國傳教牧師楊格非其人和平端正此乃貴監督所早知茲據稟稱本
月初七日同一傳教之醫生馬根知往孝感縣地方之魏家灣行至周家河離

魏家灣尙有四五里之遙忽有多人從張家灣管家灣小張家灣周么灣等處之各村庄前來無故圍擁欺打因楊格非最爲熟習中國語言於是向伊等婉轉理論孰知不由分說反欺打更甚幸其地無磚石僅有泥團土塊醫生馬根知楊格非皆被無數土塊擲打而楊格非受重傷二處一傷在面頰一傷在腦後俱破皮出血其勢竟欲打死我兩人而後已向伊等聲說我們就要回去始見放行等語查華人欺打英人突然而起自屬案關緊要且楊格非素爲和平端正之士醫生馬根知亦屬安分自愛之人斷不致在該處生事而張家灣等處居民無故惡打此事尤爲緊要爲此特請貴監督立即查辦從嚴究懲以免日後復蹈故習再據楊格非聲稱該處欺打之人各村有頭目率領前來如周么灣帶人來者張新春小張家灣帶人來者容喜管家灣帶人來者管端至其餘在場之首從人等雖未知其姓名然面貌尙無記憶當面時即可辨認如監督處派委員往拿滋事之人楊格非願同前往可逐一指出其人等語查所稟滋事地方乃貴監督治下且距漢非遙在貴監督想有親臨查辦之意本領事

亦願偕往爲此照會貴監督請煩查照望切施行須至照會者光緒二年正月

初十日

照抄江漢關監督李來文

爲照會事案照前准貴領事府照會以傳教牧師楊格非醫生馬根知往孝感縣魏家灣行至周家河地方被人欺侮土塊擲傷照請查辦等因當經轉飭孝感縣趕緊查拿爲首滋事之張新春等到案從嚴懲辦去後茲據該縣稟稱遵查孝邑地方爲南北各省通衢各國通商以來從無英國教牧入境傳授耶穌教之人亦未奉文有英國人來孝遊歷之事該國教牧楊格非醫生馬根知係初入孝境何致無故被人欺打又何能知悉爲首之姓名謂爲各村有頭目率領如果情真則孝邑鄉民實屬目無法紀卑職當於是日戌刻親詣英國領事處會晤問明楊格非寓所即赴該寓驗明楊格非鼻之左竅邊微有去粗皮一點血結腦後並無傷痕詢據該教牧楊格非口操中國言語聲稱從前向未到過孝感正月月初七日同英國醫生馬根知中國教民魏宏炳及蕭姓一共

四人坐船至卑縣北涇嘴登岸欲赴魏家灣教訓在漢鎮習教之人行至周家河卽被多人圍擁撿取地上土塊擲打經伊等婉轉理說方行退散伊不日仍須前往該處至爲首欺打之張新春等三人係蕭姓及魏宏炳認識並知容喜姓鄭請卽拿辦等語卑職當以好言撫慰揆厥其由似因鄉愚初見外國之人視爲稀奇以致聚觀喧嘩人多嘈雜故有誤傷之事一俟公竣返署開篆後卽當查拿滋事之人照例懲治仍俟此案辦結稟請照會英國領事府再行來孝定可不蹈故習該教牧楊格非比卽首肯無言卑職卽於十八日回署當卽飭差查拿滋事爲首之張新春等務獲究懲一面傳到附近周家河一帶各灣觀成下會保正周厚陞監生萬壽榮耆民鄭和松和隆會武舉宋登瀛等到案飭交滋事首從人等訊明此案肇衅之由實因正初各處村庄拜年人多鄉民見聞不廣初見外國服飾之人入境以爲稀罕觀者如堵該教牧遂疑爲圍擁欺侮當聚觀之時幼童撿取土塊互相拋擲爲戲因而誤及該教牧醫生以致楊格非面頰受有微傷實亦事所難免維時人多嘴雜不無好事之徒出言不遜

其實萬不敢滋生事端並經查明張新春鄭容喜管端三人各以耕田小買賣生委無充當頭目帶人欺打洋人之事楊格非究被何人拋土誤傷人數衆多實難查指現在各村鄉民深爲畏懼日後再有外國人入境不敢仍前聚觀願出具切結並據原差傳獲張新春到案提訊供詞與該保正周厚陞等所稱大略相同再四嚴詰堅供委無充當頭目帶人欺打外國教牧之事如果的確該教牧焉能不受重傷而與其同行之教民蕭魏二人又安能無恙是所供並未充當頭目帶人欺打情節尙屬可信並據差稟查明鄭容喜向賣水烟營生業已外出管端鋸匠手藝出外營工自應照例議結此案英國教牧楊格非醫生馬根知初次赴卑縣地方遊歷因所過村庄正月初拜年人多乍見外國服飾之人入境遂致聚觀喧傳人多嘈雜幼童撿取土塊互相拋擲爲戲誤傷該教牧楊格非面頰微去粗皮出血該處民人實有約束子弟不嚴之罪惟該教牧楊格非究被何人拋土誤傷人數衆多實屬無從查究但教牧旣指張新春等三人爲首自非平空妄指雖研訊張新春實無充當頭目帶人欺打該教牧之事

而失察子弟非爲自應照律笞責以儆所有未到之鄭容喜管端現仍比差查
拿容俟獲日另結其餘聚觀人多應請免其置議並嚴飭該保正襟耆人等傳
諭各村庄居民務各嚴加管教子弟如有外國人入境遊歷傳教不准聚集多
人圍觀嘈雜滋生事端一面遵照奉頒條約出示徧爲張貼各路通衢務使家
喻戶曉俾外國人往來遊歷不致被人欺阻以遏後患緣奉前因所有查辦英
國教牧楊格非被人誤傷一案擬結緣由是否允協理合抄錄示稿稟請批示
祇遵並請照會英領事府查照銷案如該教牧楊格非定於何日赴卑縣由何
處入境遊歷先期照請行知以便預派幹役至彼處守候保護益昭穩妥等情
據此除批飭銷案外相應照會貴領事府請煩查照銷案並乞詢明教牧楊格
非定於何日前赴孝感縣由何處入孝邑境界先期照會以便行知望切施行
須至照會者光緒二年正月三十日計抄示稿一紙

照抄孝感縣示稿

爲出示曉諭事案奉各大憲札奉行准總理各國事務衙門頒發奏准新議各

國通商條款內開英國傳教士傳授耶穌聖教法國傳教士傳授天主教原係勸人爲善中國地方官不得禁阻又載外國民人准聽持照前往內地各處遊歷經過地方官照約保護各等因通行遵照出示曉諭在案茲查從前所貼告示因閱年已久多被風雨損壞誠恐無知鄉愚初見洋人入境遊歷或赴習教之家傳授習學鄉民見聞不廣視爲稀奇因而聚觀喧傳人多嘈雜難免不滋生事端貽害地方合再遵照奉頒條約出示曉諭爲此示仰闔邑諸色人等知悉嗣後如有洋人或教士來縣遊歷傳教慎勿稍有阻止亦不得聚集多人喧嘩嘈雜偷敢故違不遵以致滋生事端一經察覺或奉文查辦定行嚴拿到案照例懲治決不曲貸凜之慎之毋違特示

照抄照覆江漢關監督李文稿

爲照覆事接准貴監督正月三十日照會以楊格非馬根知在孝感縣地方被人欺侮一案將孝感縣稟覆情形照會前來本領事查該縣所稟查究辦法顯令人難於佩服因稟詞與確實情形不相符合其實楊格非馬根知二人被欺

者打者全是出於丁壯之人非爲幼童誤傷乃人所共知至該牧師等未受重傷之由所幸周家河地方僅有土塊擲打易於鬆散耳倘有堅實石塊則不堪設想矣本領事與貴監督面晤時談及此等滋事之人目無法紀實屬可惡理應嚴加懲治不稍恩寬然在楊格非馬根知皆爲傳教牧師遵守耶穌教恕道克己待人不忍視滋事之人受嚴治之罪若貴監督確有把握能保嗣後斷不再生事端欺侮教中人士此案卽就此了結爲此照覆貴監督請煩查照可也須至照會者再楊牧師欲日內前往魏家灣地方如尊意以爲無甚妨礙楊牧師卽於本月初四日啟行先赴孝感縣城然後再至魏家灣附此奉詢尙希見復爲荷光緒二年二月初二日

福建建甯府教民被擾案

英欽差威妥瑪知照鈔送教民被擾案關係文件照會

光緒二年三月二十八日

大英欽差駐劄中華便宜行事大臣威爲照復事照得福建建甯府城教民被擾一案光緒二年三月二十三日日本大臣接准貴親王來文閱悉查此案本大臣前於本月十四日與貴署各大臣面談公事之間專行提及今將領事官柏照會福州辦理通商事務官憲等件抄錄併附查閱可也爲此照會須至照會者右照會大清欽命總理各國事務和碩恭親王一千八百七十六年四月二十二日丙子年三月二十八日計粘抄一紙

英領事官致福州辦理通商事務官憲照會等件鈔單

原件附光緒二年三月廿八日

英欽差威妥瑪照會內

大英欽命管理本國通商事務駐劄福州領事官柏爲照會事頃據英教士胡約翰稟稱本月初六日建甯府城有聯甲局張孔脩葉勵菴張如種林業許層層許奶婆庇李紅奴子等率衆四十人將耶穌教堂拆毀將教民林善誠石思

明潘求道林克明等四人拖至萬壽宮剝光衣服兩手背綁將各人自己髮辮
掛樹吊起再三拷打百般辱罵有兩點鐘之久方纔放下復拖往街坊與眾人
觀看笑罵當有建安縣縣官同其衙門差役從旁眼見未有彈壓合懇照會中
國官聽憑請其辦理等情據此除據稟具詳駐京欽差大臣威外合急備文照
會貴道煩為查照希嚴飭建寧府地方官勒差按拘張孔脩等一千匪徒律擬
並押令賠償起蓋教堂是荷須至照會者右照會大清欽命

辦理通商事務三品銜補用
道福州府正堂林 鹽運使
街督辦通商事務福建候補

道司徒 提調通
商局務調署臺灣
府正堂張

一千八百七十六年三月十五日光緒丙子二年二月二十日照會

英領事官送閱教民林善誠原稟照會

光緒二年二月廿日 原件附三月
英欽差照會內

大英欽命管理本國通商事務駐劄福州領事官柏為照會事頃據英教士胡
約翰口稟現有教民林善誠所具稟帖一扣本要申呈建寧府衙門因不敢前
往投遞懇代將此稟由省轉到建寧府衙門等情據此合將胡教士所呈教民
林善誠原稟一扣備文照會貴道煩為查照希即閱過仍將原稟轉至建寧府
衙門是荷須至照會者右照會大清欽命

辦理通商事務三品銜補用道福州府正堂林
鹽運使街督辦通商事務福建候補道司徒
提調通商局務調署臺灣府正堂張

一千八

百七十六年三月十五日光緒丙子二年二月二十日照會計移教民林善誠
原稟一扣

教民林善誠稟 原件附光緒二年二月廿日英領事官照會內

具稟教民林善誠爲甲首率衆毀堂擄物私刑行兇懇請追償懲辦事竊誠於
舊年五月間奉派往建甯府宣傳耶穌聖教向府城前街崇儒地方租出厝屋
一座以爲禮拜堂居住誠平日懍遵天津安分守己勸善懲惡和睦友鄰恪守
教規毫非弗染閭里週知不意於本年二月初一日起在建聯甲廩生葉勳菴
舉人張孔修及張如種許奶婆庇李紅奴子許層層林業父子二人等共六十
六名又用錢招集上西河人二十名大州人二十名設席會盟驅逐傳教每日
來禮拜堂吵擾極惡言以相加誠恐惡黨勢必行兇預稟建安邑主懇請飭差
諭止以免事端詎知惡黨愈集愈多造作謠言強人罷市文武官員兵役皆難
彈壓突於二月初六日巳時甲首率兇黨四十餘人持械拆毀禮拜堂強搶衣
服打破器具網縛誠與教友石思朋潘求道林克明四人解至皇殿旁邊懸吊

樹上卸衣以籐鞭拷打觸鼻以香烟薰蒸用鐵使牙齒開腮用醋和髮針灌口
種種荼毒幾至瀕死迨過午時將誠等擒出殿外由大街環至後街凌辱示衆
衆皆以誠等無辜受累見憐後聞府憲巡街察訪惡黨方肯放鬆索子驅誠等
出城謂誠等倘有再來必不饒恕似此不法天理難容懇請府憲大人籤拘追
究責令賠償禮拜堂俾教民得以立錫而惡黨不至肆行無忌則教民戴德無
涯矣切稟光緒二年二月日具稟教民林善誠叩

福建羅源縣教民被逐案

英欽差威妥瑪知照羅源教民被逐各緣由照會
光緒二年四月十七日
大英欽差駐劄中華便宜行事大臣威爲照會事照得茲據本國駐福州領事官詳文內稱福建羅源縣鄉民迎賽神會勒令教民陳道道出爲福首並捐錢等事該教民答以在教不肯曲從經鄉民陳泉金等攻逼該教民逐令逃避他鄉並將該教民桐茶油樹七百餘株盡行砍伐該教民具呈稟明羅源縣令不料張縣令官印金鑑批駁皆以陳泉金等橫行爲是各等情本大臣據此相應備文照會貴親王悉知並將柏領事官本年三月初三日照會閩省官憲公文一件暨陳道道呈詞一紙羅源張縣令二月批示各一件抄錄粘附呈閱祈爲查照可也爲此照會須至照會者右照會大清欽命總理各國事務和碩恭親王一千八百七十六年五月初十日丙子年四月十七日計粘抄一紙

英領事官致福州辦理通商事務官憲照會等鈔單

原件附光緒二年四月十七日英欽差威

妥瑪照會內

大英欽命管理本國通商事務駐劄福州領事官柏爲照會事前據英教士胡約翰稟稱本年正月十五日羅源縣洋中村鄉民要迎賽一神勒教民陳道道幫助爲福首並捐錢等事道答以身經從教凡屬迎神賽會與教規不符不肯曲從乃鄉民有陳泉金陳爲進陳六六陳乾灼陳玉環五人等攻逼道與其眷屬不准在其本屋居住又將道之桐茶油樹七百餘株盡行砍伐此種桐茶油樹每年共計可出息二十五元道稟羅源縣辦理在案詎羅源縣毫不查看情形於二月初三日批稟以教民於迎賽神明應當幫助出資至桐茶樹被伐則視爲無實惟羅源縣並未飭查何以知之茲將陳道道原稟並羅源縣稟批抄錄呈懇辦理等情據此查陳泉金等行爲其無理法已極羅源縣故縱此輩視其批陳道道稟詞與上年五月間貴局所發示諭大不相符未知羅源縣是否未見此宗局示抑或已知之而故違遵耶合就照抄陳道道稟羅源縣稟詞並羅源縣稟批備文照會貴_{道府}煩爲查照希即轉飭俾陳道道回家並賠償其被伐桐茶油樹之所吃虧即拘陳泉金等懲辦是荷須至照會者右照會大清欽

命

辦理通商事務三品銜補用道福州府正堂林
隨運使銜督辦通商事務福建候補道司徒
提調通商局務調署臺灣府正堂張

一千八百七十六年三月二十八日光緒丙子

二年三月初三日照會計移抄陳道道原稟並羅源縣稟批通聯一紙

陳道道呈詞

丙子正月二十九日傳呈爲勒派迎神竟行毀業恩准飭差傳集訊事竊道居住下際洋中村緣村內祀有臨水夫人於本正月初八日族衆陳泉金同爲進六六乾灼玉環等強派道爲福首以及派道爲神前阜班勻出戲資奈道從教迎神之事本與教規相反固難與從道亦向金等求免詎金等不諒以道違衆竟勒遵派道不曲徇終日攻迫逃避他鄉迨二十二日將道山桐茶樹七百餘根儘行砍拔甚至村內之水不許挑飲並逐道母弟出鄉居住時道情迫奔訴羅源總堂陳傳道處剖明蒙陳傳道不忍彼此視爲秦越到村勸其睦族勿以小節爲計較而金等不從必使道無家可歸而後快似此非憑廉明洞察飭差傳集訊究賠償惟恐人業兩空寃無由伸不已瀝情呈叩

羅源縣二月初三日批示

臨水夫人爲陳氏家神威靈顯著國朝封之該村供奉演戲以昭誠敬歲有常
經該民人又係陳氏子陳泉金等派爾福首並出戲資本屬分所當然該民人
偏執己見不知敬神之理據稱砍伐桐茶不准挑水更屬詞不近情顯非盡實
不准

工程史料

總理工程處三和等奏估修太平村南府景山等處工料銀兩摺

乾隆三十六年

十二月初七日

初七日奴才三和英廉劉浩謹奏爲奏聞估需銀兩事乾隆三十六年六月二十九日奉旨南府景山所有房間墻垣着三和英廉劉浩踏勘修理欽此欽遵奴才等查得太平村南府景山寓所共有房六百八十九間係雍正年蓋造今已四十餘年乾隆四年二十四年三十一年雖經三次修理但並未大修只係擇其急應粘修者量加修理而未經修葺者尙多現今頭停滲漏瓦片脫落墻垣坍塌並有柱木歪扭全行坍塌之處加以今年雨水過勤是以必須大加修理始足堅久今奴才等率員詳細查勘得此項房百一間有康熙年間蓋造者亦有雍正年間蓋十八間無庸修理外有業經坍塌應行補蓋房十五間有柱木歪扭墻垣閃裂應行挑牽撥正房七十間有頭停滲漏應行拆寔房五百三十七間有夾隴捉節房三十九間以上四項共房六百六十一間俱應挑換木

植添補料件又成砌坍塌閃裂門樓五十九座院牆湊長四百四十三丈除出
運渣土未經入估外共估需工料銀一萬八千六百三十六兩八錢二分八厘
內除領用官辦木植抵銀三千一百六十六兩九錢五分淨需銀一萬五千四
百六十九兩八錢七分八厘再查城內南府景山共有房一千三百一間有康
熙年間蓋造者亦有雍正年間蓋造者迄今年分亦久雖於乾隆十六二十三
二十七等年曾經修理亦係量加粘修又過多年兼經本年雨水歪閃滲漏委
難棲止此內有柱未歪扭應行拆蓋撥正房二百九十六間有椽木糟朽頭停
滲漏應行拆寔房六百三十四間有頭停滲漏應行夾隴房三百七十一間以
上三項共計應修房一千三百一間俱應挑換木植添補料件又補砌並粘修
牆垣共湊長一千五十五丈門樓一百五十八座以及祖師殿火神殿配殿戲
台扮戲房南府大門油畫見新除出運渣土未經估入外共估需工料銀三萬
四千七兩八錢八厘內除領用官辦木植抵銀三千八百二十兩六錢五厘淨
需銀三萬一百八十七兩二錢三厘以上圓明園太平村並城內南府景山二

處共應修房一千九百六十二間墻垣一千四百九十八丈及門樓等項統計
估需工料銀四萬五千六百五十七兩八分一厘謹將應修房間並估需工料
銀分晰細數另繕清單恭呈御覽至太平村應修房六百六十一間所需銀一
萬五千四百六十九兩八錢七分八厘卽在圓明園銀庫項下動用其城內南
府景山應修房一千三百一間所需銀三萬一百八十七兩二錢三厘在廣儲
司銀庫領用俱於今冬備料明春妥固修理統俟工竣另行詳細查核據實奏
銷爲此謹具奏聞等因繕寫摺片於本日具奏奉旨知道了欽此

圓明園太平村修理景山南府寓所住房六百六十一間內補蓋房十五間
估需工料銀七百十七兩一錢四分九厘挑竿撥正房七十間估需工料銀
二千四百三十二兩九錢五分九厘拆寢房五百三十七間估需工料銀一
萬三千四百四十八兩六錢五分七厘夾隴房三十九間估需工料銀八十
五兩六錢八分三厘成砌墻垣湊長四百四十三丈門樓五十九座估需工
料銀一千九百五十二兩三錢八分共估需工料銀一萬八千六百三十六

兩八錢二分八厘內除領用官辦木植抵銀三千一百六十六兩九錢五分
淨需銀一萬五千四百六十九兩八錢七分八厘城內修理景山南府住房
一千三百一間內拆蓋撥正房二百九十六間估需工料銀一萬二百八十
七兩三錢七分二厘揭寔房六百三十四間估需工料銀一萬七千七百五
十三兩九分一厘夾隴房三百七十一間估需工料銀一千三百三十五兩
七錢一分六厘補砌並粘修墻垣共湊長一千五十五丈門樓一百五十八
座估需工料銀三千七百八兩五錢三分五厘祖師殿火神殿配殿戲台扮
戲房南府大門油畫見新估需工料銀九百二十三兩九分四厘共估需工
料銀三萬四千七兩八錢八厘內除領用官辦木植抵銀三千八百二十兩
六錢五厘淨需銀三萬一百八十七兩二錢三厘二共銀四萬五千六百五
十七兩八分一厘

總理工程處三和等奏估造供經龕一座需用工料銀兩摺

乾隆三十六年十二月二

十二日奴才三和英廉劉浩四格謹奏爲奏聞估需工料銀兩事乾隆三十年十一月二十八日遵旨甘珠爾經一部一百八套着交三和在慈寧宮花園北樓上照咸若館欵式供奉業經燙樣奏准在案今奴才等詳細估計得辦造供經龕一座計五間內明三間各面闊一丈三尺五寸兩稍間各面闊一丈二尺六寸五分通面闊六丈五尺八寸進深六尺七寸柱高六尺徑四寸外前挑五寸安裝垂柱繚環板歡門牙子髹廬帽龕下須彌座通面闊六丈五尺八寸進深六尺八寸高二尺經座四座俱用松木成造須彌座圭角方舍束腰並龕內背板經座做硃紅油飾巴達馬金琢墨柱子迎面二色金雲龍髹廬帽垂柱繚環板稜花岔角使油貼金並西稍間改安樓口拆錠樓板進深板牆上改安真假門口二座等項所需工料除銀硃向廣儲司領用外估需工料銀六百六兩二錢七分七厘請向廣儲司支領內有領用官廠木植值銀二百八十四兩一錢二分照數交納圓明園銀庫歸款俟經龕造成後另行查核奏銷謹將估需工料銀兩分晰細數另繕清單一併恭呈御覽爲此謹具奏聞等因繕片

於本日具奏奉旨知道了欽此

木植銀二百八十四兩一錢二分

領用官廠不植將此項價銀繳還圓明園庫歸款

繩斤銀三兩九錢七分六厘

鐵料銀三兩六錢七分八厘

大木作工價銀三兩二錢一分八厘

南木作工價銀七十五兩五錢一分九厘

搭材作工價銀五兩七分七厘

油畫工料銀二百二十八兩八錢八分九厘

拉運架木車脚銀一兩八錢

共銀六百六兩二錢七分七厘

總理工程處三和等奏估修嵩祝法淵等寺需用工料銀兩摺

乾隆三十二年十二

月二十二日

二十二日奴才三和英廉劉浩謹奏為奏聞估計修理嵩祝寺需用工料銀兩

數目事乾隆三十六年七月初六日經和碩額駙福隆安摺奏內開遵旨查勘嵩祝寺法淵妙應等寺粘修工程臣隨督率司員詳細踏勘得嵩祝寺山門殿宇鐘鼓樓圍房共計一百五十九間規模完整惟頭停滲漏瓦片間有脫落椽望墻垣亦有糟朽閃裂油畫地仗爆裂者甚多亦應照式分別揭窰粘修見新其佛像龕案供器等項顏色微有氳舊亦應照式粘補見新又法淵寺山門殿宇鐘鼓樓經堂配殿圍房共計一百四間內大雄殿一座鑽金柱糟朽沉陷金枋劈裂處所甚多似應行拆蓋其別座頭停墻垣等項與嵩祝寺大略相同臣查此二廟自雍正十二年修理以來至今並未粘修應請次第修理以昭虔誠至妙應寺山門殿宇鐘鼓樓圍房共計一百四十二間各座頭停並墻垣石料間有滲漏閃裂糟城之處而佛像龕案供器亦有顏色氳舊者再殿後舍利塔一座須彌座少有糟城塔身灰皮間有脫落較嵩祝法淵二寺亦稍覺整固查此廟係乾隆十八年奉旨修理似應先行粘修嵩祝法淵二寺俟告竣後再行修理妙應寺謹將殿宇房間塔座墻垣等項應行粘修處所情形繕摺奏聞俟

命下之日卽移行總理工程大臣三和等再加詳細勘估奏請錢糧次第修理等因具奏奉旨知道了欽此欽遵奴才等隨卽率同司員前往嵩祝寺逐座詳加踏勘得殿宇房屋共一百五十九間內山門三間天王殿三間大殿五間鐘鼓樓二座配殿六間東西順山房二十八間看守房三間頭停椽望槽朽俱皆滲漏瓦片間有脫落俱應拆寔挑換椽望又御座房五間前抱厦二間配殿六間後樓房七間配殿十間燈亭一座視其頭停瓦片尙屬整齊毋庸粘修惟下簷台幫拆砌石料歸隴墻垣下肩剔補上身找抹提漿地面挑墁兩邊僧房六十七間柱木歪斜沉陷應挑萃撥正墩接柱木挑換椽望裝修旗杆二座嗎呢杆四座歸隴石料週圍大墻院墻共湊長二百九十七丈八尺內應拆砌者一百三十五丈三尺其餘一百六十二丈五尺剔補勾抹抹飾提漿拆蓋門樓一座隨墻門口三十三座挑墁甬路海墁散水並各殿內佛像龕案陳設供器等項多有虧舊損壞俱應找補見新以及各座油畫裱糊見新等項除高麗紙張照例行取應用其歡門旛帳揚旛雨搭簾子絨繩棕繩等項俱各虧舊揚旛亦

有破壞交該處自行查辦外所需辦買木石磚瓦灰斤繩麻釘鐵雜料並給各作匠夫工價運價等項共約估銀一萬四千三百三十八兩四錢四分七厘請向廣儲司銀庫支領恭候命下奴才等派員於明春擇吉興修統俟完竣奴才等另行詳細查核據實奏銷謹將約估工料銀兩數目另繕清單一併恭呈御覽至修理法淵寺所估工料現在確核另行具奏謹奏聞等因繕片於本日交於奏事御前侍衛春岱轉奏奉旨知道了欽此

嵩祝寺粘修各座殿宇房間約估銀兩清單

木植銀一千一百二十六兩二錢五分九厘

石料銀五十六兩六錢八分一厘

磚瓦銀一千四十一兩九錢一分一厘

灰斤銀二千二百五十三兩九錢一分一厘

繩麻銀三百七十四兩一錢三分六厘

雜料銀九百五十六兩五錢五厘

釘鐵糟朽銀七十六兩四錢二分三厘

大木作工價銀一百六十八兩二錢八分

楠木作工價銀一百二十兩二錢七分四厘

石作工價銀一百五十六兩三分

瓦作工價銀二千六十三兩二錢八厘

搭材作工價銀一百六十兩九錢九厘

土作工價銀十四兩二錢

油畫工料銀四千五百三兩三錢三分二厘

稜糊工料銀二百三十七兩六厘

佛像陳設工料銀七百九十一兩七錢七分八厘

出運渣土銀二百三十七兩六錢四釐

通共約估物料工價銀一萬四千三百三十八兩四錢四分七厘

行取二號高麗紙一千七十六張

總理工程處三和等奏估修盤山行宮等處需用工料銀兩摺

乾隆三十六年十二月二十六日

月二十六日

二十六日奴才三和英廉劉浩謹奏爲奏聞估計工料銀兩事據東陵總管內務府大臣公義奏稱據盤山總管討格報稱本年雨水過多將盤山併大新莊學警山等三處冲刷滲漏以及糟朽脫落處所共計二十項等因奴才隨親身前往逐處詳細查看與所報無異查上年盤山等處冲刷工程經奴才奏明交三和等轉交添蓋布景房間監督修理在案今將盤山等三處冲刷滲漏併糟朽脫落之處請旨交總理工程事務大臣派員踏勘估計修理等因於乾隆三十六年九月初九日具奏奉硃批知道了欽此欽遵奴才等隨派員勘估得盤山行宮園內東西河泊岸冲刷各長三十丈拆安石料背後墊土闌檻冲去十扇換新料心鏡齋門外東邊海墁泊岸冲壞長二丈五尺添換石料農樂軒柵木墻倒壞四丈稻地淤平應行清挖又半天樓平台三間大木糟壞拆換新料光柿黃油拆墁平台納天籟房一座計二間滲漏夾隴提節拆墁地面內理

糊飾冷然閣南面方亭椽望槽朽添換新料內裏糊飾院牆抹飾白灰長三丈
壽萱堂東邊淨房木植槽朽挑換椽望拆窰頭停牆板粉油脫落找補油飾四
面芙蓉八方單簷柱亭一座大木槽壞添換新料裝修原係坐橙欄杆亦皆損
壞今擬改砌磚坎墻以資堅固單簷柱才不走錯石料歸安拆窰頭停拆墁地
面澹懷堂東淨房大木槽朽挑換柱木枋樑滿換椽望拆窰頭停站板光粉油
遊廊內抹飾白灰長三丈天巖雲秀戲台西面墩接柱子一根拆窰後簷天溝
油飾柱木一根煙霄迥曠添換木藥欄花心三扇延春堂並半天樓添換雨搭
七架放鶴亭添換上下簷飛簷椽望拆窰頭停油飾過色見新智仁樂處院牆
白灰脫落長六丈五尺抹飾白灰游心清曠西遊廊內粉油板皴裂鑿砍光粉
油接要樓週圍掛簷板油飾脫落鑿砍光皴花油含遠樓週圍掛簷板油飾脫
落鑿砍油飾皴花油大牆外看守房一座計二間後簷坍塌應行拆蓋大木舊
料拆安添換簷椽裝修糟朽添換新料拆砌山簷牆拆窰頭停以及池子稻地
開挖沙土油飾裱糊粘補修理十八項估需工料銀一千九百七十七兩六錢

九分二厘又大新莊行宮內拆換院牆門口四座拆砌墻垣湊長十丈九尺七寸拆砌看守房山墻一堵估需工料銀一百二十兩四錢八分六厘再改建五空石平橋一座添補石料掬水打壩等項估需工料銀二千四百兩四錢一分二厘又擊髻山行宮虎皮石大墻三段坍塌拆砌湊長七丈四尺院墻二丈一尺五寸抹飾白灰等項估需工料銀九十七兩五錢一分六厘以上三項共估需銀四千五百九十六兩一錢六厘行取高麗紙二百四十二張毛邊紙二百八十二張所需銀兩請向廣儲司支領應用統俟工竣之日奴才等另行詳細查核據實奏銷謹將工料銀兩細數分晰繕寫清單一併恭呈御覽爲此謹奏聞等因繕片於本日具奏奉旨知道了欽此

盤山等三項工程

木植銀六百九十五兩六錢二分五厘

石料銀一千二百六十五兩一分七厘

磚瓦銀一百九十六兩一分三厘

灰斤銀二百六十八兩五錢八分八厘

繩麻銀七十六兩一錢七分

釘鐵銀九十六兩八錢九分一厘

雜料銀一百八十六兩一錢一分七厘

大木作銀九十五兩三錢五分二厘

南木作銀五十七兩六錢七厘

石作銀六百一兩八錢九分七厘

瓦作銀二百五十七兩九錢七分六厘

山子作銀一百七十七兩九錢二分

搭彩作銀十九兩五錢九分一厘

土作銀二百八十三兩一錢六厘

油畫工料銀一百三十七兩一錢三分九厘

稜糊工料銀八兩三錢五分八厘

兩搭工料銀一百十兩七錢三分八厘

租賃架木銀十二兩

拉運雜料車脚銀五十兩

共估需銀四千五百九十六兩一錢六厘